

萬 有 文 庫

第一集一千種

王 雲 五 主 編


明 史 紀 事 本 末

(六)

谷 應 泰 著

遵 寧 省 商 務 印 書 館 發 行





明史紀事本末

(六)

谷應泰著

國學基本叢書

明史紀事本末

卷三十八

平鄖陽盜

憲宗成化元年夏四月。荆襄盜劉千斤反。荆襄之上游爲鄖陽。鄖。古麋國。春秋時爲楚附庸。地多山。元至正間。流賊作亂。終元世竟不能制。明初。命鄧愈以大兵勦除之。空其地。禁流民不得入。然地界湖廣。河南。陝西三省閒。又多曠土。山谷扞塞。林箐蒙密。中有草木可採掘食。正統二年歲饑。民徙入。不可禁。聚既多。無所稟約束。中巧黠者自相雄長。稍能驅役之。漢中守臣以聞。且言不卽誅。恐有後患。上曰。小民爲饑寒所迫。奈何遽用兵誅之。命御史金敬往撫輯。敬至。謫數人戍。餘陽聽撫。而大奸皆潛伏不出。尋復縱。勢益滋蔓。有錦衣千戶楊英者。奉使河南。策其必反。上疏言流逋之衆。宜選良吏賑恤其饑。漸圖所以散遣之。辭甚諄切。不報。三省長吏又多諉非己境。因循不治。至是。千斤遂倡亂。千斤名通。河南西華人。有膂力。縣治門有石獅。重千斤。通手舉之。人因號爲劉千斤。正統中。潛往襄陽房縣。與僧尹天峯謀亂。成化元年。有石龍號石和尚。糾合馮子龍數百人。四散剽掠。通令男聰約子龍舉事。乃於大石廠立黃旗。聚衆。據海溪寺。稱王。僞號漢建元德勝。僞署將軍元帥。以石和尚爲謀主。劉長子苗龍。苗虎爲羽翼。衆至數萬。劫襄鄧境。時王恕方以副都出撫。懸榜曉諭。而未受分討之命。賊狃爲故常。不肯散。恕聞於朝曰。民可撫也。而奸民好亂者非兵不威。五月。命撫甯伯朱永爲總兵官。兵部尙書白圭提督軍務。太監唐慎。林貴監軍。合

湖廣總兵李震討劉千斤副都御史王恕會三師並進擣其巢。

二年春二月擢鎮守荆襄王信爲都指揮同知劉千斤之亂荆襄震驚信度房陵險要自率數十騎往據之調集民兵不滿千人賊四千餘人突至圍攻之援絕信多張旗舉火日夜不息歷四旬間以死士出城五六里舉火礮賊以爲援兵也驚潰信追擊大利三月提督荆襄軍務兵部尙書白圭奏言賊首劉千斤在襄陽房縣豆沙河諸處萬山之中分作七屯臣等議欲分兵四路一從南漳一從遠安一從房縣一從穀城犄角並進剋期會勦上報曰兵不可遙制悉如卿所議行五月兵部尙書白圭及湖廣總兵都督李震帥師討荆襄賊平之先是圭至南陽與撫甯伯朱永由南漳入遇賊誘之臨城擊破之永適有疾留鎮圭與唐慎李震湖廣巡撫王儉進兵潭頭坪林貴鮑政自遠安進兵馬良坪喜信王信自房縣進兵浪口河王恕率都指揮劉清等亦自穀城進兵洞庭廟賊見勢逼千斤走壽陽欲出陝西苗龍走大市欲出遠安卽調兵往壽陽截其奔軼千斤退保大市與龍合都指揮田廣進至雁坪擊賊敗之追及於古口山明日廣與諸軍皆會進攻賊陣斬其子劉聰僞都司苗虎一百餘人乘勝進兵賊退入巢穴山險復雨淖圭身先士卒至格兜賊憑險爲拒時諸路兵會已二日攻之不能下士卒聞圭來倍奮勇圭乃命劉清將兵千餘由閒道出賊後焚其營而自以大軍臨之圭與震儉攻其右王信擊其左鮑政衝其中賊數萬餘迎戰顧其營火遂驚走蹂躪死者無算擊斬萬人生擒劉千斤獻俘京師與苗龍等四十人皆磔於市男子十歲以上者斬之惟劉長子石和尚遁去深入巖險會永病愈更帥兵搜餘賊六月石和尚集衆千餘焚劫四川大昌縣殺夔州通判王禎命分兵討之冬十月提督湖廣軍務白圭誘執賊首石和尚

時石和尚劉長子聚衆巫山。圭遣參將喜信、鮑政都指揮白玉隨賊向往勦之。賊計窮食盡乞降。圭遣指揮張英誘之。劉長子遂縛石和尚送至喜信營。受之。長子詣信營乞食。信餉之。俾居近營。既而并誘執劉千斤妻連氏及其僞職常通王靖、張石英等六百餘人。事聞。上命搜捕餘黨。賊平。諸將忌張英功。譖於朱永。謂英多獲賊賄。以事捶殺之。遂班師。十一月。磔石和尚。劉長子於市。敍平荆襄功。進撫甯伯朱永爲侯。李震與甯伯白圭進太子少保。

四年春三月。改戶部右侍郎楊璿爲右副都御史。撫治荆襄。南陽流民。

六年冬十月。荆襄賊李鬍子聚衆反。先是賊平。諸郡邑控制戍守皆未設。會歲大旱。流民入山者九十萬人。李鬍子新鄭人。劉千斤餘黨也。千斤敗。與其黨王彪走免。糾合餘黨小王洪、石歪膊往來南漳內鄉。渭南閒。復倡流民爲亂。僞稱太平王。立一條蛇坐山虎等號。官軍累捕不獲。荆襄南陽爲之騷然。十一月。命都御史項忠總督河南湖廣。荆襄軍務。討李鬍子。

七年春正月。右都御史項忠至襄陽。以見卒寡弱。請調永順等土兵從之。諸將請速進。忠曰。流民逃聚山谷。陷盜中不能自脫耳。乃駐兵分布險要。遣人持榜招諭。有能去賊自歸者。禁勿殺。於是民多攜老弱來歸。王彪引數十人覘軍。且阻歸者。出不意擒之。兵部尙書白圭言。賊黨困饑寒。出於迫脅。宜敕項忠相度機勢。計撫綏長策。不必調永順保靖土兵。以滋騷動。忠奏曰。賊據險在萬山中。復有流民從之。患將不測。臣奉詔旨。開諭生路。流民攜扶老幼出山。日夜不絕。計四十餘萬。今若中止土兵。恐民間之。仍懷疑懼。且王彪雖授首。而渠魁李鬍子尙伏竄。設復再聚。重調爲難。上報曰。土兵已到。嚴約不得擾民。其流民在山。

睿戀生業。不至爲非者。用心設法撫安之。十一月。荆襄南陽流賊平。進總督軍務項忠。右都御史。敕留撫治。忠之用兵。荆豫也。遣人持榜入山招諭。負險不服。卽縱兵勦不赦。李鬍子勢孤。潛伏山寨。忠遣副使余洵。都指揮李振率兵追捕。遇鬍子於竹山縣。盡死拒敵。爲官軍所擒。小王洪尙有衆五百屯於均州龍潭。亦破擒之。凡遣還鄉者四十萬人。俘斬二千人。編戍者萬餘人。時流民有自洪武以來。家業延子孫。未嘗爲惡者。兵入盡草薶之。死者枕藉山谷。其戍湖貴者又多道死。棄屍江澚。議者謂忠此役實多濫殺。旣樹平荆襄碑。或亦呼爲墮淚以嘲忠云。十二月。都御史項忠獻荆襄俘李鬍子一百二十九人。刑部尙書陸瑜等會奏坐罪有差。

八年夏四月。給事中梁璟疏劾都御史項忠偏聽檢討張寬。御史劉潔。總兵李震。縱殺要功。上曰。荆襄流民爲患中外。皆以爲慮。今及蕩平。卽議其後。非所以激勸天下也。兵部尙書白圭又言。忠所上荆陽功次文冊。與震前後不同。請勸上亦不聽。五月。都御史項忠乞致仕。慰留之。召還院。先是有星孛於天田。言者謂荆襄殺戮所致。忠再疏自列。因乞骸骨。上溫旨答之。

十二年春二月。命都御史原傑經略鄖陽。撫定流民。自成化初年。陝西至荆襄唐鄧之間。皆長山大谷。綿亙千里。所至流逋藏聚。爲梗。劉千斤之亂。因之。至李鬍子復亂。流民無慮百萬。都御史項忠奉命捕逐之。死者不可勝計。祭酒周洪謨乃著流民說。略曰。昔因修天下地理志。見東晉時廬松之民流至荆州。乃僑置松滋縣於荆江之南。陝西雍州之民流聚襄陽。乃僑置南雍州於襄西之側。其後松滋遂隸於荆州。南雍遂并於襄陽。垂今千載。甯謐如故。此前代處置荆襄流民者。甚得其道。若今聽其近諸縣者。附藉遠諸

縣者設州縣以撫之。置官吏編里甲。寬徭役。使安生業。則流民皆齊民矣。都御史李賓深然其說。至是流民復集如前。賓凡援洪謨說疏上之。上可焉。命傑往莅其事。秋七月。北城兵馬吏目文會疏言。荆襄自古用武之地。宣德間有流民鄒百川。楊繼保。匿聚爲非。正統中。民胡忠等開墾荒田。始入版籍。編成里甲。成化年來。劉千斤。石和尚。李鬍子。相繼作亂。大臣處置失宜。終未安輯。今河南歲歉。民饑入山就食。勢不可止。能保無後日之患。謹條上三事。曰。荆襄土地肥饒。皆可耕種。遠年入籍流民。可給還田土。所附籍者。領田十力。耕量存恤之。其願回籍者。聽。曰。流民潛處。出沒不常。乞選良有司爲之撫綏。軍衛官爲之守禦。則流民自安。曰。荆襄上流爲吳楚要害。道路多通。必於總隘之處。加設府衛州縣。立爲保甲。通貨賄以足其衣食。立學校以厚其風俗。則其民日趨於善矣。上大是之。命都御史原傑采其言用之。九月。都御史原傑奏言。信陽固始等州縣。南抵蘄黃。西接荆襄。東連鳳陽。霍邱。山勢繚互。河流四達。盜易出沒。且鳳陽陳州近皆被災。流民載道。盜入霍邱。劫帑藏。執縣官。民庶騷動。誠宜思患預防。今請於汝甯所屬信陽等一十三州縣。令二司巡守。官選壯丁備器械馬匹。委任二官督之。緝捕盜賊。又信陽軍民雜處。奸盜尤衆。請調守備南陽河南都指揮官。俾得專禦盜賊。禁治銀洞。又商城縣南接六安州二百餘里。四野曠漫。而金剛臺巡檢司乃在縣北。今請遷置縣馬頭山。詔悉如所言之。十一月。開設湖廣鄖陽府。卽其地設湖廣行都司衛所及縣。時都御史原傑徧歷諸郡縣。深山窮谷無不親至。至則宣朝廷德意。問民疾苦。諸父老皆忻然願附版籍爲良民。於是大會湖廣河南陝西撫按藩臬之臣。籍流民得十一萬三千餘戶。遣歸故土者一萬六千餘戶。其願留者九萬六千餘戶。許各自占曠土。官爲計丁力限給之。令開墾爲永業。以

供賦役。置郡縣統之。於是湖廣割竹山地分置竹溪縣。割鄖津地分置鄖西縣。河南割南陽。汝州。唐縣地分置桐柏。南召。伊陽三縣。陝西析商縣地爲商南。山陽二縣。而以商縣爲商州。使流寓土著者參錯以居。又卽鄖縣城置鄖陽府。以統鄖及竹山。竹溪。鄖西。上津六縣。且立行都司衛於鄖陽。以保障控禦之。經畫既定。乃上其事。因薦鄖州知州吳遠爲鄖陽知府。諸州縣皆選鄰境良能吏習知其事者爲之。又以地界三省。無統紀。薦御史吳道宏才望。請代己任。得兼制三省。撫治八郡。居鄖陽。上遂擢道宏爲大理少卿。代傑撫治。馳璽書賜傑召還。以爲南京兵部尙書。傑勞苦成疾。南還。竟卒於驛舍。荆襄之民間之無不流泣者。尋以撫治鄖陽大理少卿吳道宏爲右僉都御史。開府鄖陽。著爲令。

谷應泰曰。鄖陽斗絕。西北錯處陝蜀。南下則光信。南陽。豫州之域。漢北楚山。又皆蜿蜒互屬。下抵鳳陽。廬霍地徧千里。壤接數省。河流四達。複嶺萬里。麋羅之故國。鸞熊之邊陲也。終元之世。嘯聚不散。高皇削平。竟虛其地。禁民勿入。夫亦周終徙洛。漢不復豐。惡其淵藪。遂作邱墟。然而鄖處萬山。林箐叢密。地旣紆迴。利堪樵給。流民生長。莫隸版圖。家占土田。不知租稅。此亦桃源之於武陵。五丁之於蜀道矣。流聚旣多。遂生雄長。天水泥丸之志。尉陀坐大之形。劉通以膂力號劉千斤。石龍以妖讖號石和尚。憲宗之世。僭號改元。唐鄖荆襄騷然不靖。白圭以大司馬出督五道。俱進。敗之南漳。懸軍深入。焚其中營。千斤獻俘闕下。而臨陣斬獲者萬有餘人。蹂亂走死者不可勝算。兵威懲創於斯烈矣。旣而劉長子又以餘黨復聚巫山。圭發師掩捕。連營入討。食盡援窮。誘殺渠帥。獲縛者復六百餘人。而上猶命縱兵誅勦。必無噍類。示不臣之炯鑒。明天威之莫犯也。旣而李鬍子又以餘黨搆亂荆襄。項忠主勦尤力。徧召土兵。進營竹房。陳俘二千。

編戍滿萬。乃史稱其草薶良民。枕藉山谷。戍多道死。尸棄江干。項羽盡屠外黃。晉楚遂築京觀。不是過也。然而流民入山就食。雲集如前。大臣悔禍。始議更張。洪謨著流民之說。文會有三事之陳。原傑乃披榛履險。宣布慰問。於是山東之民扶杖聽詔。河北之老流涕觀軍。入籍者十一萬三千。願留者九萬六千餘戶。各占曠土。竝輸賦役。割地三省。設置六縣。而鄖陽巍然重鎮矣。鄭國成渠。秦溉萬頃。受降河外。唐築三城。國寶慢藏。利器誨盜。非惟棄險。實啓戎心。故一介之吏。賢於十萬之師。擾鉏之民。勝於組練之甲。然後知飲至凱旋。稱俘獻廟。當時虔劉我赤子。抑又何多也。原傑崎嶇布置。竟以勞卒。萊公雷竹。叔子峴碑。視死人如刈。以爲己功者。吾又以傑爲百世如生也。

卷三十九

平藤峽盜

憲宗成化元年春正月。兩廣蠻寇亂。以都督同知趙輔爲征蠻將軍。都督僉事和勇爲游擊將軍。擢浙江左參政韓雍右僉都御史。贊理軍務。率兵討之。太監盧康。陳宣爲監軍。戶部尙書薛遠督餉。御史劉慶。汪霖紀功。廣西潯州之境。萬山盤蠱。中有水曰潯江。發源柳慶。東繞至潯。帶象州。永安。修仁。荔浦。平樂諸郡。縣夾江諸山。皆哈峽巖。其最險惡地爲大藤峽。蓋有孤藤渡峽。礪如徒杠也。南截潯水爲府江。自藤峽至府江約三百餘里。地惟藤峽最高。登藤峽巔。數百里皆歷歷目前。軍旅之聚散往來。可顧盼盡也。諸蠻以此爲奧區。桂平。大宣鄉。崇姜里。爲前庭。象州東鄉。武宣北鄉。爲後戶。藤縣五屯。障其左。貴縣龍山。據其

右若兩臂然。峽北巖峒以百計。如仙人關。九層崖。其極險阨者。峽以南有牛腸。大姑諸村。皆緣江立寨。藤峽。府江之間。爲力山。力山之險。倍藤峽焉。又南則爲府江。周遭蓋六百里。其中多冥巖。奧谷。層磴絕壁。入者手挽足移。十步九折。一失足則隕身數百仞下。中產獠人。藍胡。盤四姓爲渠魁。力山又有瑣人。善傅毒藥。弩矢中人無不立斃者。雖四姓獠亦憚之。景泰中。獠渠侯大狗等倡亂。嘯聚萬人。修仁。荔浦。力山。平樂。皆應之。攻墮郡縣。出沒山谷。守吏不能制。率以招撫糜之。時朝廷方北患瓦剌。未遑也。天順中。益縱恣。詔能捕大狗者。予千金。爵一級。竟不可得。久之。蔓延廣東。高廉雷之境。所至殘燬。兩廣守臣皆待罪。至是。兵部尙書王竑言。峽賊爲亂久矣。其始皆由守臣以招撫爲功。譬之驕子。愈恤愈啼。非撻之流血。啼不止。浙江左叅政韓雍有文武才。以討賊屬之。可紓南顧憂。而諸將中。惟都督趙輔勇略可任。故有是命。關外之事。一以屬雍。制曰。將士有功者。得自署。三司而下。不用命者。以軍法論。朕不中制也。夏六月。韓雍至南京。會諸將議進兵方略。皆曰。兩廣殘破。盜所在屯聚。宜分兵撲滅之。令一軍由庾嶺入廣東。而大軍由湖廣入廣西。賊在廣東者。驅之在廣西者。困之。如是。乃可滅。雍曰。不然。賊已流劫。蔓出。而所至與戰。是煽禍也。大藤峽。賊之巢穴。今以全師擣之。既至彼地。南可以援高廉雷。東可以應南韶。西可以取柳慶。北可以斷陽峒諸路。勢如常山之蛇。動無不應。舉無不克。心腹既潰。諸處之賊。假息遊魂耳。何煩於逐乎。舍此不圖。而分兵四出。則賊愈奔突。汗漫郡縣。愈殘燬。所謂救火而噓之也。未見其濟。諸將曰。誠如公言。乃以官軍三萬人兼程而進。秋七月。韓雍大軍至全州。會陽峒西延苗賊爲梗。出偏師擊滅之。斬失律指揮李英等四人。軍中股栗。九月。大軍至桂林。雍按圖籍。與諸將議曰。修仁。荔浦。藤峽之羽翼也。不翦除此。藤峽

勢不孤。乃以永順、保靖及西江土兵十六萬人分五路進。先破修仁。窮追至力山。大敗之。生擒一千二百餘人。斬首七千三百餘級。冬十一月。大軍至潯州。雍延父老問計。皆曰：大藤天險，重巖密箐，三時瘴癘，某等生長其地，不能得其要領。且賊聞大兵至，爲備益堅。莫若屯兵圍之，且戰且守，可不戰自斃。雍曰：不然。峽山遼遠，紛披錯雜，六百餘里，安可圍也。且屯兵日久，將士懈弛，睥睨衝突，豈能悉防。兵法曰：寧我薄人，又曰：先人有奪人之心。今我軍新破府江，勇氣百倍，賊聞震恐喪魄矣。因而乘之，可立破也。乃以總兵歐信、參將孫騏、高瑞等帥六萬八千人爲右軍，自象州武宣分五道入攻其北。以都指揮白全、楊嶼、張剛、王杞等帥九萬二千人爲左軍，由桂林平南分八道入攻其南。以參將孫震指揮陳文章等守左江及龍山五屯，防其奔軼。雍與趙輔和勇營高振嶺以督諸軍。雍復令歐信曰：山北旣破，便可提兵深入，夾攻桂州。橫石諸崖，令夏正曰、林峒、沙田、府江閒道也。宜越古眉、雙髻諸山，伏兵林峒，隄其東奔。諸將聽命。十二月朔，韓雍督諸將四面並進攻之。別遣兵斷諸山口，賊聞兵來，置婦女積聚於桂州橫石寺塘諸崖。乃悉力出捍，峽南排柵堅密，滾木礮石，標槍毒矢，下如注。官軍登山仰攻，雍督戰益急，敵少息。雍覘其怠，急擊之。將士用團牌，扒山虎，壓二筰等器，魚貫以進，皆殊死戰。呼聲撼山，峽若崩。賊氣奪，雍命縱火焚烈，烟燄蔽天。日晝晦，賊大潰散，盡破山南石門。大信、道袍、屋廈、諸舍、老鼠、寒嶺、竹踏、梁、腦、紫、荆、林、峒、沙田、古營、牛腸、大帖、大寨等寨，賊屋廬藏積皆赭。日暮，雍命就營賊巢中，衆栗栗視雍，恬然整暇。咸恃以安。賊旣潰入橫石諸崖，雍飭兵窮追，伐山通道，行數日至其地。賊上九層樓等山，絕崖懸壁，勢控霄漢。林箐叢惡，非人所處。樹柵據之，用千斤礮石大木轉而下，聲若雷。巖谷皆應，弩矢雨注。雍誘使大發，而令人閒道潛陟其巔。

覘賊發竭。舉礮爲應。自卯至未。賊發竭。礮舉。大駭。雍督將士緣木攀蘿而升。援引蟻附漫山。奮擊連數日。夜。慶戰數百合。發火箭焚其柵。而夏正等亦自林峒來援。與大兵合。賊大驚潰。生擒侯大狗等七百八十餘人。斬首三千二百餘級。磨崖石紀歲月而還。土人謂自國初但禁禦無出掠。未有窮入巢穴破之者。峽中有大藤如斗。延亙兩崖。諸蠻蟻度。故曰大藤峽。乃斬峽藤斷之。易名斷藤峽。分兵捕雷廉。高肇諸寇。先後平之。先是大軍由修仁。荔浦抵大藤峽。道有儒生里老數十百人。跪持香曰。我輩苦賊久矣。莫敢自拔。今幸遇天兵。得自爲良民。願先三軍鋒。雍大怒。顧左右叱曰。此皆賊耳。縛斬之。左右初疑雍何乃殺良民。旣縛而袂中利刃出。迺知閒也。悉斷頸。散手足。剝腸胃。分掛箐棘中。累累相屬。賊大驚沮。曰。韓公天威也。有新會丞陶魯隸麾下。雍威嚴擬王公。軍門設銅鼓數十。儀節詳密。三司長吏見長跪白事。慴悚如小吏。一日。顧峒賊最強險難下者。方設策。魯時直膳侍左右。謾謂曰。丞揣我何意。魯曰。得非某賊耶。雍曰。然。丞能往否。曰。匪直能。且易耳。雍怒曰。賊銳甚。又搯阻自衛。非大兵不可入。部下文武數百千人。熟視無可當吾寄者。吾方欲身往。若安得易。且使若食粟能之耳。叢爾邑不能理。乃言擊賊。若妄。當笞。魯不拜。抗言曰。謂魯解食粟。不解擊賊者。明公未悉魯也。蔣琬。龐統。廢邑事矣。後乃爲蜀名臣。公幸毋棄魯。使得畢技。當悉縛諸醜以獻。雍異之。改容曰。若所將幾何。而辦曰。三百人。曰。何少。曰。魯猶以爲多也。兵貴精。請擇雍。曰。任若自爲之。魯乃標式約曰。有能力舉百鈞。矢射二百步者。來。三軍之士十五萬人。其比於式者。得二百五十人。曰。未也。請復下令募。募數日。足。魯乃爲別將。自操練陣法。椎牛酒犒。甘苦共之。士爭願爲死。率以先登。大破賊。斬首無算。賊聞陶家軍。駭慄遁避。叩首乞爲良民。得毋死幸甚。魯成子也。雍又奏調達官。

軍千餘。專命偏將領之。獠獞出入山林。利用標槍牌刀諸短兵。不能當騎射。故達軍所向輒克。賊畏之。既平。雍乃上言諸獠之性。憚見官吏。攝以流官。終難靖亂。有上隆州土知州岑鐸。以罪在禁。而事屬曖昧。蠻戎之族。不必責以彝倫。請復其職。俾領藤峽。開設州縣。仍隸潯州。又以各處巡檢俱係流官。不諳民情。不辨地里。往來遷轉。難以責成。而部下有功土人李昇等。效有勤勞。請量授土巡檢官秩。彼皆感恩圖報。必能保障一方。又請移周冲巡檢司於勒馬。移靖甯巡檢司於獻俘。移思隆巡檢於碧灘。東鄉龍山各宜設。添又別類獞人。國初曾充戎伍。近用兵時。遣千戶李慶招之。多肯效順。請卽本地開設千戶所。因其故俗。卽以李慶爲之渠帥。統之。亦可羈縻。獷悍。藉以保障地方。奏上。上皆納之。卽斷藤峽。設武靖州。以岑鐸爲知州。屬潯州府。班師論功。擢雍左副都御史。賜文綵幣六。官一子錦衣鎮撫。封趙輔武靖伯。子孫世襲。初出軍時。趙輔知雍才。軍事一聽雍。而輔但用命戰。故所向有功。

世宗嘉靖六年夏五月。起新建伯王守仁。以兵部尙書總制兩廣。江西。湖廣軍務。先是。成化中。韓雍平斷藤峽。民獲甯居者二十餘年。正德五年後。遺孽漸熾。峽南賊尤甚。橫江禦人。總制都御史陳金謂諸蠻不過利魚鹽耳。乃與約商船入峽者。計船大小。給魚鹽與之。諸蠻就水濱受去。如權稅。然不得爲梗。蠻初獲利聽約。道頗通。金亦謂此法可久。易峽名永通。亡何。諸蠻緣此益無忌。大肆掠奪。稍不愜。卽殺之。因循猖獗。遂負固大爲寇。至是。守仁至兩廣。定田州。盧蘇王受降。而兩江父老遮道言。斷藤峽及八寨賊倡亂狀。守仁上疏請討從之。

七年春二月。王守仁以湖廣兵至南甯。而盧蘇王受初降。亦願立功自贖。守仁乃集諸守臣將帥議。命湖

廣僉事汪濬。廣西副使翁素。僉事吳天挺。及參將張經。都指揮謝珮。監湖廣土兵。襲勦斷藤峽賊。仍督分永順兵。進勦牛鵬等寨。保靖兵。進勦六寺等寨。期以四月初二。各至信地。先是。峽賊聞軍門。檄湖廣土兵。至。皆逃匿深險。復聞以蘇受降。罷兵。又守仁駐南甯。故爲散遣諸兵。狀寇弛不爲備。湖廣兵。皆偃旗臥鼓。馳至。與官軍突進。四面夾攻之。賊敗。退保仙女大山。據險結砦。官軍攀木緣崖仰攻之。初四日。破賊寨。初五日。復攻破油榨石壁大陂等巢。賊敗奔斷藤峽。官軍追擊破之。賊奔渡橫石江。覆溺死者六百餘人。官軍自後急擊。俘獲甚衆。賊潰散。初十日。遍搜山峒。無遺。還兵至潯州。守仁密檄諸將。移兵勦仙臺等賊。二十一日。仍前分布各哨。永順兵由磐石大黃石登岸。進勦仙臺。花相等處。保靖兵由烏江口丹竹埠登岸。進勦白竹古陶羅鳳等處。期五月十三日抵巢。各賊聞牛腸等寨破滅。則大懼。方據險設伏待之。官軍驟進。奮勇夾擊。賊不支。奔入永安力山。乃分兵圍之。賊復大潰。奔諸路者。多爲防截。參將沈希儀等所擒。於是斷藤之賊。略盡。先是守仁因八寨賊去。斷藤稍遠。別遣布政使林富副總兵張佑。監督土目盧蘇王受五千餘衆。進勦八寨。猺賊各兵乘夜銜枚襲之。味爽抵賊巢。遂破石門天險。賊始驚覺。且戰且走。日午。賊結聚二千餘人。來拒。官軍奮擊之。賊旣失險。氣奪不能支。遂大潰。奔入重險。官軍夜募死士。掩其不備。襲古蓬寨。破之。連克固安古鉢。都者峒諸寨。於是八寨之賊亦盡。前後擒斬三千餘人。兩江底定。守仁乃班師。疏薦林富爲都御史。巡撫其地。論功褒賞有差。

十五年夏六月。斷藤峽盜殺戍卒。先是王守仁旣歸。卒於道。而武靖州知州岑邦佐不能鎮輯。且墨賊賄多。曲庇之。故峽以北。賊復漸肆猖獗。其目侯勝海者。居弩灘爲亂。指揮潘翰臣聽土目黃貴。章香言誘

勝海殺之。實貴。香利勝海田廬也。勝海弟公丁集衆噪城下殺人。僉事鄧閱參議孫繼武言於都御史潘旦請討之。參將沈希儀沮之。白猾賊未易取。須春江漲。以數千人從武宣順流下撲之。乃可不聽。閱繼武還潯州。以千人往擊賊。先遁去。斬一病夫而還。遂言賊已斂跡。請立堡戍。旦從之。希儀復言賊未大創。兵威不振。立堡難守。旦不聽。六月。堡成。閱令黃貴。韋香以三百人戍之。許擇取勝海田廬不禁。諸獠大憤。恚。邦佐又陰黨之。公丁遂集衆二千人。夜寇堡。殺戍卒二百餘人。貴香走免。巡按御史諸演疏其事。閱與繼武以啓。覽罷去。亡何。旦亦去。侍郎蔡經代之。

十七年春正月。蔡經集諸司議發兵。曰。諸君度滅賊須兵幾何。副總兵張經曰。不過萬人。蔡經曰。太少。沈希儀曰。非八萬人不可。蔡經曰。太多。副使翁萬達曰。二君言各有據。襲而取之。曰。勦。犛罪討之。曰。征。由張君言。勦也。由沈君言。征也。然賊爲備久矣。勦之無功。從沈君言。便會朝議。欲征安南。事遂已。公丁等益橫。時出殺掠。潯人苦之。冬。侯公丁伏誅。先是。副使翁萬達力請討公丁。御史鄒堯臣亦贊之。蔡經乃會安遠侯柳珣。決計發兵。以兵事屬萬達。萬達廉得百戶許雄。素通賊狀。劫之曰。能擒公丁。貸汝死。不卽論如法。雄懼。請効力自贖。萬達陽庇公丁。謂讎家誣之耳。乃捕繫許訟公丁者數人。責其啓。覈公丁果遣人自列。萬達陽許之。又令雄假稱貸爲賄。公丁喜。益信雄。會萬達巡他郡。以事屬參議田汝成。汝成召雄申飭之。雄乃給公丁曰。潯人久以爾爲口實。幸上之人不信。今分守公新到。何不自訴。寇堡事由他。獠庶相信也。公丁然之。隨雄來見汝成。復列冤狀。汝成曰。聞仇家誣汝。已逮治之矣。慰遣之。乃密授意城中居民被賊害者。家出歐公丁一市。皆譁。遂逮入繫獄。遣雄諭其黨曰。寇堡事公丁委罪諸獠。須鞫實坐之。若等誠

謂公丁寃。須罪人得釋之。萬一事自公丁當共棄之。勿以一公丁自取滅亡也。諸獠競言事果由公丁。聽論之。不敢黨。乃檻致公丁軍門。磔誅之。

十八年春三月。兵部侍郎蔡經平斷藤峽諸盜。先是。田汝成既誅公丁。乃言之督府。謂首惡既擒。賊方震駭。宜乘此時進兵討賊。經許之。會沈希儀病。乃以副總兵張經將左軍。副使翁萬達監之。南甯指揮王良輔。朱昇。凌浦。柳浦。周新。孫文繡屬焉。以都指揮高乾將右軍。副使梁廷振監之。賓州指揮馬文傑。王俊。戚振。吳國章屬焉。副使蕭畹紀功。參政林士元及汝成督餉。張經議欲以少兵勦之。略示威。勿深入。又欲舍紫荊諸處賊藪。勿擊。萬達持不可。謂少出兵。墮損軍威。諸獠恣肆。久不大削之。不足懾其心。汝成亦如萬達議。萬達又言之督府曰。峽南亦劇賊。但今兵力不能并及。姑緩之以俟。後經然之。乃以二月兩軍齊發。左軍則王良輔由牛渚灣。越武靖。攻紫荊。姜老鼠諸巢。朱昇由三等村。渡蓼水。攻石門。黃泥嶺諸巢。柳浦由白沙灣。攻道袍。梅嶺諸巢。凌浦由白沙灣。攻木昂。梅嶺諸巢。周維新由白沙灣。攻藤沖。綠水沖諸巢。孫文繡由藤峽。夾攻大坑巢。共三萬五千人。分六道進。右軍則馬文傑由武宣。攻碧灘。綠水諸巢。王俊等由武宣入山。攻羅淥上峒。戚振攻中峒。吳國章攻下峒。共一萬六千餘人。分四道。南北夾攻之。賊大窘。擁衆奔林峒。而東。王良輔邀擊之。中斷。復西奔。諸軍合擊。斬首千餘。賊謂往年據險結巢。故被官兵擊破。皆殲焉。至是不復立砦。惟漫走山谷。閒令官兵疲於追逐。且曠日久。多費糧餉。必速退。其東奔者。入羅連山。萬達移兵攻之。檄右軍抵長洲。沿江繞出賊背。賊於諸險隘。伏械器防禦甚多。官兵皆以計發之。追斬百餘級。賊益窘。會右軍迷失道。愆期三日。又土兵盧蘇受賊賂。斂兵縱之。漫匿諸山谷。人言羅連山官兵古所

未至者。賊遁深入。不復窮追。云時平南縣有小田羅應古陶古思諸獠。亦據險勿靖。萬達等移兵勦之。三月。班師。招賊餘黨二百餘人降之。江南胡姓諸獠歸順者亦千餘人。藤峽盡平。萬達汝成獻議於督府。凡七事。曰。編保甲以置新民。立營堡以通江道。設備禦以控上遊。清狼田以正疆界。改州治以建屯所。處款兵以慎邊防。權商稅以資公費。蔡經多採納。疏行之。捷聞。諸將帥守臣皆陞賞有差。

谷應泰曰。大藤當粵西潯州地。其水則潯水。府江環五百里。其山則夾江峻嶺。嵒峒峭削。盤矗捫天。高瞰數百里。下乃臨不測。入蓬谷矣。其徑則引一線。歷千盤。非手援足躡。不得施步而上也。其中則前庭後戶。左障右屯。一夫荷戟。千夫辟易也。其前則牛腸大牯。臨江壁立。敵不敢仰關而攻也。其後則仙人九層巖。峒星列。道里不可裹糧而窮也。其產則密箐叢篁。毒瘴惡霧。非人所處也。其器則長矢勁弩。淬毒傅藥。人且應弦輒斃也。披圖攷俗。綜其大略。而大藤之勢。蓋不特蜀有烏道蠶叢。華有天門箭括已爲之開。立郡縣而流官土官交錯難治。建置學校而獠峒獷悍。淫殺性成。通魚鹽以誘之。則見利犬狺。建營堡以備之。而失勢獸駭。辟之嬰匏腫。樗輸匠不能斲。籛條戚族。官司不能材。神皋之甌脫。上天之驕子也。然而俗編赤縣。未可不臣地。屬神州。終難度外。而嚴尤論狄。古無上策。賈讓治河。僅行中計。大軍不可久駐。孤軍不敢追險。合圍防其軼出。屯守更苦劫掠。癘疥之疾。能廢七尺之軀。涓滴之流。可盡江河之水。王竑所以決戰。韓雍所以肆伐也。先渡潯水。決其樊籬。縱火大藤。空其巢穴。賊乃悉衆憑險。斂兵拒戰。而王師援木攀蘿。楚歌四合。援牽蟻附。漢幟先登。摩石橫崖之谷。題銘九層之樓。鋸藤絕絙。奪其世險。至於支離身首。剝剔肝腸。金鼓陳兵。旌旗秉燾。蓋以天兵不易至。重險不易得。阨吭拊背。急擊勿失。宣暢皇靈。顯彰天殛。取

威定亂。在是役也。然猶武備中弛。苞孽復盛。二十年而有新建之師。又十年而有蔡經之捷。賊勢稍殊。兵形亦異。類皆窮追深入。耀甲橫戈。蓋孔明巴蜀。率用嚴刑。張詠益州。輒行捕斬。亂國重典。有自來矣。然而興利除弊。勿擾其俗。仁漸義摩。久革其故。蠻戎猶有人性。長吏者又何可以馬上治之也。與。

卷四十

興復哈密

憲宗成化九年秋九月。土魯番速檀阿力王入哈密。掠王母併金印去。哈密漢西域唐伊州地也。漢武帝置酒泉。張掖。燉煌三郡。卽今甘涼肅之境。又出玉門關。通西域。置都護。及戊己校尉。以斷單于右臂。則今之哈密云。晉爲涼州牧張實所據。歷後魏。西域復通。隋煬帝因裴矩進圖記。躬度玉門關。置伊吾。且末鎮。唐隸隴右道。安氏之亂。盡沒吐番地。無水而常寒。多雪。雪銷乃得水。元封其裔勿納失里爲威武王。居之。明初。高皇帝定陝西。甘肅諸鎮。嘉峪關以西。置不問。永樂二年。安克帖木兒貢馬。詔封爲忠順王。卽其地。置哈密衛。關以西衛七。曰哈密。安定。阿瑞。赤斤。蒙古。曲先。罕東。罕東左。而哈密最西。東去肅州。西去土魯番。各千五百里。北數百里。抵瓦剌。以天山爲界。授其目馬哈麻火只目等。指揮分居苦峪城。賜金印。詔命凡西域入貢。悉道哈密譯上。亦漢武遺意也。洪熙元年。哈密貢硫黃。上曰。哈密既有硫黃。猝遇戰鬪。須有備。敕邊吏知之。正統四年。瓦剌強。數侵哈密。哈密懼。稍持兩端。璽書諭毋背德。終不悛。至拘留漢人轉鬻。使至多暴橫。邊吏請責。詔曲貸之。而忠順王再傳爲李羅帖木兒。天順末見弑。無子。王母弩溫答失力署。

國事爲亂。加思蘭所破。成化二年。兵部奏王母以亂。加思蘭侵掠。避居赤斤苦峪。今寇退。宜敕復還哈密。乃以把塔木兒爲右都督。守哈密。把塔木兒本畏兀族。故忠義王外孫也。把塔木兒死。子罕慎嗣。而土魯番時強盛。控弦可五萬。其速檀阿力尤雄黠。至是挾哈密赤斤諸夷。王母不從。遂見掠。及劫金印去。罕慎竄苦峪城。衆或歸附居肅州。亦有隨土魯番去者。甘肅撫臣婁良以聞。兵部尙書白圭言。哈密爲我西藩。土魯番無故陵奪。不救。則赤斤諸衛盡爲蠶食。嘉峪外皆強敵。而禍中甘肅。請集廷議恢復。因舉高陽伯李文右。通政劉文往經略之。比至哈密。衆已潰散。文等不敢深入。止調集罕東赤斤諸番兵數千駐苦峪。不敢進。謬言阿力欲乘虛擣二衛。宜還兵自爲守。遂引還。阿力始輕中國。益侵內屬。諸衛矣。

十二年秋八月。土魯番速檀阿力遣使赤兒米郎來貢。且致書鎮巡。飾罪稱王母已死。朝使至。卽歸金印城池。然特漫語無還意。其冬。更鑄哈密衛印。賜罕慎於苦峪。立衛居之。給土田及牛具穀種。

十四年秋九月。土魯番速檀阿力死。子阿黑麻立。甘肅撫臣王濬請乘閒納罕慎。

二十年冬十一月。罕慎入哈密。嗣忠順王罕慎貪殘。國人歛望。西域諸貢使苦要索。亦有違言。

孝宗宏治元年冬十二月。土魯番阿黑麻殺忠順王罕慎。復據哈密。時有奸回誘阿黑麻攻哈密。阿黑麻亦壯。乃曰。罕慎非脫脫族。安得王。王故應我。陽好語罕慎聯姻。至哈密城下。頂經盟誘殺之。亦未敢頌言。據哈密。遣使入貢。請代領西域職貢。且乞大通事往和番。兵部尙書馬文升議。阿黑麻與哈密各有分地。安得相并。以北敵之強。我屢卻款。何小蠢輒與我構。且憫然王也。姑許如例入貢。請敕阿黑麻還王母及金印。歸我哈密。璽書下阿黑麻怒。欲勒兵近塞要求之。其帥牙蘭曰。哈密去吾土千餘里。敵國輻輳。遠出

已難。況又近塞乎。今既殺其國王。番漢之心皆怒。若合謀并進。非我利也。不如乘勢還城。印以款之。再圖後舉。阿黑麻以爲然。

四年秋九月。遣哈密衛目寫亦虎仙齋。敕諭阿黑麻。時王母已死。阿黑麻亦悔禍。上金印及所據城。詔褒予金幣。以寫亦虎仙爲都督僉事。

五年春二月。封哈密陝巴爲忠順王。遣使護歸之。馬文升謂戎俗重種類。且服元久。哈密故有回回。畏兀兒。哈刺灰三種。而北山又有小列禿也。克力相侵逼。必得元裔填之。可懾諸番。乃行求忠順近屬。得曲先安定王姪陝巴。奏令甘肅守再詢諸番族。立陝巴可否狀。番族合詞稱陝巴可立爲王。主國事。乃遣使立之。輔以奄克孛刺阿朮郎。未幾。諸番索陝巴犒賜不得。阿朮郎更引哈刺灰。彘掠土魯番牛馬。阿黑麻怒。復構兵。

六年冬十月。土魯番復入哈密。執陝巴。支解阿朮郎。掠金印去。事聞。大學士邱濬謂馬文升曰。哈密事重。須公一行。文升曰。方隅有事。臣子豈敢辭勞。但西域賈胡嗜利不善騎射。古未有西域能爲中國大患者。徐當靖之。濬復言。文升乃請行。諸大臣言北寇方強。文升不當往甘涼。委四方邊事。乃敕兵部侍郎張海。都督侯謙往經理之。會阿黑麻前遣部目寫亦滿速兒等四十餘人。修貢至京。事下廷議。通事王英言。罕東及野也克力諸部。怨土魯番刺骨。撫而用之。皆吾兵也。西域使者方叩關互市爲利。我聲阿黑麻罪。謝勿與通。令彼窮而歸怨。皆吾閒也。而廷議皆欲命海以檄往。如土魯番歸陝巴。聽予貢。否則留前使勿遣。而絕其後使。上從之。海等至甘州。遣哈密人齋璽書往責阿黑麻歸陝巴。不報。乃修嘉峪關。捕哈密奸回。

通阿黑麻者二十餘人。奏請戍廣西。

七年春三月。下張海。侯謙於獄。張海等不候命還歸。上言西域遠方。勢難興師。哈密存亡。不必過煩中國。上怒其無功。下海謙獄黜之。馬文升乃請安置。寫亦滿等四十餘人於閩廣。示懲創而稍用。王英策閉嘉峪關。命西域諸賈胡歸。怨阿黑麻以攜其黨。從之。乃閉嘉峪關。絕西域貢時。西域諸胡皆言成化閒我入貢。皇帝先遣中貴人迓我河南。至京。宴賜甚夥。今不撫我。我泛海萬里貢獅子。謂我開海道。卻不受。卽從河西貢者。賞宴亦薄。天朝棄絕我。相率從阿黑麻。且拒命。中國能奈我何。阿黑麻遂復入據哈密。自稱可汗。大掠罕東諸郡。諜言土魯番用雲梯攻肅州。且躡甘州。文升曰。是虛聲恫喝我耳。土魯番至哈密十數程。中經黑風川。哈密至苦峪。又數程。皆絕水草。貢使往返。馱水行。我第整師旅。謹斥堠。俟彼至肅州。出奇縱擊。以逸待勞。可匹馬不返也。

八年春正月。阿黑麻西去。留其將牙蘭與撒他兒。率精銳二百守哈密。牙蘭機警。驍勇絕人。能并開六弓。夜宿十徙。雖近人莫知所在。哈密脅從者。皆懼服不敢動。其雄黠者。反從之。教以撓中國之術。馬文升聞之曰。是可襲而執也。召肅州指揮楊翥。至計事。撫其背曰。爾諳番情。悉西域道里。今欲擒斬牙蘭。計安出。翥言罕東有閒道。可進兵。不旬日達哈密。文升曰。如若言以罕東兵三千爲鋒。我師三千後繼。各持數日熟食。兼程襲之。若何。翥稱善。而甘肅巡撫都御史許進亦以方略聞。且曰。不斬牙蘭。則天威不振。土魯番終不知懼。文升乃卽以前策屬之。遣副總兵彭清統銳卒。由南山馳至罕東。卽調罕東諸番兵。乘夜倍道襲牙蘭。冬十一月。許進及總兵劉甯抵肅州。駐師嘉峪關外。遲罕東兵不至。乃偕彭清循大路行。以水草

乏絕不得馳。牙蘭諷知，乘千里馬宵遁。惟餘番人八百，登臺自保。師入哈密，得陝巴妻女并牛羊三千，斬級六十。拔哈密脅從者八百餘人還。我士馬乏糧，多物故。文升徒取空城，竟失牙蘭。然西域亦自是頗憚中國。上念邊吏冒險出塞進等，及太監陸闇皆以功陞秩。

九年三月，阿黑麻自將撒他兒等復襲哈密。據之。先是，王師入哈密，牙蘭遁歸。阿黑麻方與赤斤蒙古衛相讎，攻不能大發兵。使別將將輕騎五百圖復哈密。復爲赤斤蒙古所邀殺殆盡。至是，乃自率兵下之。令撒他兒奄克孛刺居守。撒他兒不敢守哈密，就刺木城駐軍。奄克孛刺密結瓦刺小列秃襲斬撒他兒，還守哈密。阿黑麻遣兵圍之。哈密人舉火，小列秃來援，退走。

十年冬十月，阿黑麻以絕貢失互市，又自許進撫甘肅。小列秃及乜克力等部，中國撓之，窘甚。令其兄馬黑上書願悔過，還陝巴及金印。易前四十餘使，予貢如故。馬文升恐挾詐，請俟陝巴金印至甘州始取。寫亦滿速等於閩廣。十一月，起前左都御史王越總制甘涼等處邊務，經略哈密。

十一年秋八月，復封陝巴爲哈密忠順王。先是，都御史王越出河西，而陝巴至甘州。越乃令三種都督回，則寫亦虎仙畏兀兒則奄克孛刺、哈刺灰則拜迭力迷失，共佐陝巴。奄克孛刺以罕慎弟與陝巴不協，乃妻陝巴以罕慎女，結好。遂賜陝巴蟒玉大帽爲忠順王，而釋寫亦滿速等西歸。會越卒，哈密三種人久厭兵，初以國亂入居甘肅境上，射獵爲生，不願歸哈密。文升請留家之半肅州，往來自便。

十二年春正月，遣兵護忠順王陝巴還哈密。以都督寫亦虎仙、奄克孛刺、拜迭力迷失三種輔之。主國事。土魯番諸部許復入京朝貢，勞賜良厚。已而陝巴嗜酒，培克諸部、阿孛刺等咸貳。

十七年春三月。阿孛剌陰搆阿黑麻。迎其次子真帖木兒來王哈密。陝巴棄城走沙州。邊吏遣指揮董傑及奄克孛剌往諭部衆迎陝巴還。阿孛剌不從。傑等遂擒殺阿孛剌。并其黨六人。餘怖服。乃別令都指揮朱瑄勒兵送陝巴復王。而以真帖木兒還土魯番。真帖木兒時年十三。其母亦罕慎女也。會阿黑麻死。諸子讐殺。真帖木兒懼不敢還。願依奄克孛剌曰。吾外祖也。守臣恐與陝巴嫌。乃攜還使居甘州。而其兄滿速兒尋定國亂自立。

武宗正德元年秋九月。忠順王陝巴死。子拜牙郎嗣位。淫虐不親政事。

八年春二月。真帖木兒還土魯番。先是滿速兒稱速檀朝貢。上書求真帖木兒。兵部議質所愛不予。尋逸出城追獲之。七年冬。始令哈密三都督送真帖木兒西還。至哈密。奄克孛剌欲止之。寫亦虎仙滿刺哈三不可護。至土魯番。以國情輸滿速兒。潛誘拜牙郎叛中國。拜牙郎淫暴心怵。屬部謀害。欲掩奄克孛剌往不從。奄克孛剌奔肅州。八月。拜牙郎棄城叛歸土魯番。滿速兒令頭目火者他只丁與寫亦虎仙滿刺哈三取金印守哈密。又令火者馬黑木等至甘州索賞。哈密諸部乃譯書言拜牙郎棄國從番。乞命將守哈密。巡撫趙鑑謬謂滿速兒忠義。守城勤勞。命撫戎官賜之金幣。撫戎官入哈密。滿速兒亦率衆至。分據刺木等城。真帖木兒又言河南大饑。人死亡且半。甘州城南黑河可引灌城。於是滿速兒及火者他只丁牙木蘭日夜聚謀侵甘肅矣。

九年秋八月。命右都御史彭澤總督甘肅。統延甯固原諸鎮兵。經略土魯番。滿速兒既據哈密。遣書鎮巡。索金幣萬贖哈密城印。總制都御史鄧璋以聞。故有是命。敕都督奄克孛剌寫亦虎仙等共守哈密。亦

斤等衛如遇土番內侵并力捍禦。

十年春正月土魯番火者他只丁寇赤斤苦峪諸處殺掠甚慘彭澤抵甘州復遣澤書索金幣澤度滿速兒強未易兵定番戎可以利啗乃以繒綺二千白金器遣通事火信同寫亦虎仙入土魯番說令和好滿速兒喜許增幣歸金印土地澤不俟報遽上言速檀滿速兒畏威悔禍已還哈密侵地及金印四月遂召澤還京巡按甘肅御史馮時雍言澤處置失宜講和辱國兵部尙書陸完寢其奏滿速兒諜知兵罷益驕四出侵掠關外諸衛及結瓦刺寇我河西且遣人索所許增幣歸印。

十一年秋九月土魯番復據哈密侵肅州初彭澤既召還趙鑑亦去陝西左布政使李昆代鑑巡撫甘肅滿速兒以金印來歸兵備副使陳九疇語昆曰彭總督遇事多模稜何面目立天地間昆不能違以雜幣二百貽之令送拜牙郎還國質留來使虎都六撒者兒糜其意滿速兒聞留二使怒令火者他只丁牙木蘭復據哈密而身引萬騎直犯肅州總兵史鏞欲自甘州來援九疇以乏食止之肅州急乃以游擊芮甯出禦土魯番鋒銳甚芮甯陣沒亡七百騎兵迫城下哈密降回居肅州城頗爲內應九疇廉得其情收繫諸回及都督失拜烟答等凡衷甲者捶殺之嬰城守調屬部兵劫其老營而潛遣使誘瓦刺擣巢穴破其三城滿速兒狼狽走副總兵鄭廉及奄克孛刺尾擊敗之瓜州土魯番乃引去九疇遂發寫亦虎仙傾陷哈密狀滿速兒復請和巡撫李昆以聞時方命彭澤及中使張永視師疏至罷遣而滿速兒實無意和不歸拜牙郎九疇謂土魯番不臣宜絕其使勿通與昆異議兵部尙書王瓊修邵澤雅右昆且忌九疇功日媒孽河西事。

十二年夏六月。失拜烟荅子米兒馬黑麻方入貢在京。覘知王瓊與彭澤鄰。突入長安左門訟冤。下錦衣衛會兵部三法司奏行。河西訊報。瓊因發澤欺罔辱國。及陳九疇輕率激變罪。逮昆。九疇至。請廷鞫。戶部尙書石玠曰。大夫出使於外。苟利社稷。專之可也。王瓊曰。納幣寇廷。致貽後患。利乎。不利乎。衆不能奪。澤幾不免。大學士楊廷和善澤。得與九疇並削籍。昆謫浙江副使。已。刑部會訊。并脫寫亦虎仙死。上幸會同館。寫亦虎仙以祕術干進。得賜國姓。隨上南征。

十六年夏四月。帝崩。世宗踐祚。六月。逮兵部尙書王瓊下獄。謫戍榆林。言官劾其忌功。陷彭澤。陳九疇也。遂起彭澤兵部尙書。九疇僉都御史。巡撫甘肅。寫亦虎仙論斬死獄中。

世宗嘉靖元年秋八月。土魯番滿速兒大舉入寇。以二萬騎入甘州。都御史陳九疇率衆先登力戰。解甘州圍。滿速兒走肅州。九疇乘夜倍道開抵肅州。來擊破之。殺其驍將火者他。只丁。衆譁。滿速兒中流矢死。遂以聞。時上以河西危急。方遣兵部尙書金獻民。都督杭雄濟師至蘭州。聞捷。用九疇議。遷其使。閉關絕貢。而滿速兒故無恙也。滿速兒歸。路遇亦不刺兵。復邀擊之。大創去。

四年春二月。土魯番牙木蘭復據哈密。率衆入沙州。侵及肅州。

五年春三月。命尙書王憲提督陝西邊務。先是。起楊一清提督軍務。一清請羈廢土魯番還城印。未幾。召入閣。以憲代。憲盡出平涼羈留貢使。往諭土魯番。令悔過伏罪。歸我哈密。

七年春正月。起王瓊爲兵部尙書。兼右都御史。提督陝西軍務。初。哈密二種避讎內徙。一居肅州東關。一居金塔寺諸處。陳九疇議移肅州北境。棄地以杜後患。大學士楊一清以各部一旦外徙。不北合瓦刺。必

西連察台。徒足召覺。議遂寢。尋王憲爲提督。復遣使往諭之。土魯番亦未肯服。而楊廷和坐議禮罷。彭澤亦去職。張璠、桂萼等用事。方讐廷和。知王瓊故怨之。言哈密不靖。由彭澤澤以廷和曲庇。惟急用瓊。西鄙乃可甯也。至是遂以瓊代憲。總督瓊被用。卽上書論澤。九疇事言滿速兒實不死。按驗九疇誣罔。萼擬坐斬。并罪廷和。刑部尙書胡世甯力爭。九疇雖上首功失實。然其人忠勇。再保河西有功。爲土魯番所忌。得不死。戍邊澤。金獻民歸里。廷和得免。十二月。牙木蘭率衆來歸。牙木蘭者。本曲先人。幼爲土魯番所掠。黠而善兵。滿速兒倚之。與寫亦虎仙等專伺我虛實。且數盜邊。至是滿速兒令牙木蘭據沙州。索羈留貢使。且率帖木哥士巴攻肅州。以遲回欲殺之。牙木蘭惟率屬帳二千。老稚萬人。奔肅州。降。乞白城山金塔寺住牧。未報。滿速兒以討牙木蘭爲辭。糾瓦剌寇肅州。副使趙載遊擊彭溶等拒卻之。八年春二月。置哈密諸部於肅州。滿速兒以牙木蘭叛。乃遣人貢獅子。因齎譯書。言願歸哈密城。及原掠人口。求牙木蘭。王瓊上言。哈密旣歸。乞令失拜煙蒼子米兒馬黑木守之。其所歸各番貢使千餘人。宜散置沙州。土巴帖木哥部落五千四百人。置白城山。哈密都督札吉孛刺部落置肅州東郭。赤斤都督瑣南東置肅州北山。金塔寺。罕東都指揮枝丹置甘州南山。且欲縛牙木蘭子之下。兵部議。廷臣頗言哈密難守。詹事霍韜力言。置哈密者。雖西北之交。以屏藩內郡。或難其守。遂欲棄之。將甘肅難守。亦棄不守乎。太宗之立哈密。因元遺孽。力能自立。借虛名以享實利。今嗣王絕矣。天之所廢。誰能興之。惟於諸戎中求雄傑。能守城印。戢部落者。因而立之。毋規規忠順後可也。兵部尙書胡世甯言。先朝不惜棄大甯。交趾。何有於哈密。哈密非大甯。交趾比也。忠順自罕順以來。狎比土魯番。且邀索我矣。國初封元孽和甯。順甯安定。

俱爲王安定又在哈密之內。近我甘肅。今存亡不可知。一切不問。而議者獨言哈密何也。臣愚謂宜專守河西。謝哈密無煩中國使。又言牙木蘭本屬部歸正。非叛者。不宜遣還。唐悉怛謀之事可鑒也。張璪等不聽。力主王瓊議。安置諸戎於肅州境內。獨畱牙木蘭不遣。如世甯言。

九年冬。滿速兒遣虎力奶翁及天方諸使貢方物。復索牙木蘭。不予。滿速兒欲伺奶翁歸。卽率諸戎寇肅州。會虎力奶翁歸道死。瓦剌又攻其北鄙。我稍息肩。來降人言土魯番欲以哈密城與失拜煙答妻。兵部因請許土魯番貢。令三年或五年爲期。使十二人入京。餘留塞上。是後名存哈密。而金印遂失。忠順王拜牙郎終不可復。無可哈密竟爲土魯番所據。諸戎部落皆爲薦食。失故土。雲翔河西塞。而北寇窟西海。瓦剌巢北山。河西三面竝居寇盜。守臣頻歲備羌戎。無暇及關外事矣。

谷應泰曰。環西北鄙部落百千。非叩邊而臣。卽仰關而攻也。漢武帝開河西四郡。以隔絕南羌。收三十六國。以斷單于右臂。殫財隕兵。浮河抵漠。其與蒲桃天馬。妄事異域者殊矣。高帝開置甘肅二鎮。勢甚孤危。成祖乃設立哈密七衛。西出肅州千五百里。北抵天山。所謂斷右臂隔西羌也。取不亡矢遺鏃。守不留兵屯戍。百年逋寇。阨其吭而有之。爲國西藩。計誠盛哉。英宗卽位。土魯番始盛。控弦數萬。奄有哈密。劫其王母。夫晉楚勢鈞。猶爭新鄭。蜀吳通好。必取荊州。以世守西藩。不能出一旅相存活。僅鑄哈密印。更賜罕慎。棄地損威。端先見矣。其後乘喪納主。盡非長策。阿黑麻旣壯。復修夙釁。再殺罕慎。孝宗仍聽其款。更立陝巴。至七年。陝巴就執。張海見欺。朝議方主用兵。許進上方略。楊翥議乘閒。夫定遠以一介使者。決機俄頃。猶然橫行絕塞。諸部怵息。至甘英抵條支。歷安息。臨西海。而進等策召罕東。罕東不赴。計斬牙蘭。牙蘭

宵遁。兵不遇敵。死亡略盡。僅得空城。爲世口實。中國長技。蓋可見矣。自此以後。賀蘭以外。不見漢室旌旗。成紀以西。無復李家部曲。然土魯猶心憚中國。蒲伏納土。自武宗時。忠順王拜牙郎棄城。抱印歸番。而番長乘釁。移書邊將。責取金幣。贖還城印。巡撫彭澤復私許繒幣。邀功恢復。罪過王恢。辱浮廣利。自西方用兵。幾四十年。土番未嘗一矢及關也。自此心輕中國。徑薄甘肅。中國稍稍被兵焉。封疆之寇未除。中朝之鬪旋作。左袒彭澤者。輔臣力排彭澤者。司馬訟大禮者。又借封疆爲赤幟。修小隙者。還假通敵爲兵端。嫉輔臣之激。始訐彭澤之欺。發主帥之謀。并陷九疇之罔。去年對簿。今歲賜環。暮入軍門。朝流荒徼。置大帥如弈棋。視巖疆如孤注。而河西以外。拱手授之他人。若夫天府金湯。棄同敵屣。而西藩甌脫。又當罪從末減矣。

卷四十一

平固原盜

憲宗成化四年夏四月。固原土達滿四叛。據石城。初洪武中。平陝西。故元平涼萬戶把丹率衆歸附。高帝授平涼衛千戶。其部落散處開城等縣。號土達。以畜牧射獵爲生。家多殷富。把丹孫滿四以貲力雄諸族。成化初。孛來毛里孩內侵。土達李俊者。獨以羊酒奉孛來。孛來喜。賜以馬。俊遂有北徙意。致仕都督張泰。牧鳴沙州。與土達鄰。張把腰等時時假寇盜劫掠之。泰以狀聞於巡撫陳介。會有通渭縣民避徭役匿滿四所。陳介下吏捕治之。滿四素縱佚不知法。頗危懼。參將劉清初至。指揮馮傑斂諸土達賄利爲餽。李俊

素狡黠。遂以言激滿四等爲亂。滿四姪滿璫爲平涼指揮。有司移檄平涼衛捕滿四。張把腰甚急。璫素慧。不知滿四等異謀。率衆往捕。滿四知之。俟璫至。佯許歸罪。有司給遣其衆散。遂劫璫。號集諸土。遂以四月叛入石城。石城在衆山中。去平涼千里。四面峭壁數十仞。無徑非引繩不可登。西山頂平。可容數千人。山罅皆牆。高二三丈。城中有數石池。可汲。池外設棧道。而棧道下則築小城護之。前有小山高數仞。如拱壁狀。山後悉築牆。高二丈五六尺。各留小門。僅容單騎。城外皆亂山。蓋昔人造之避亂者。不知所始。滿四等往獵射。故熟知其險可據。而先掘地得前代行帥府印。心動。遂叛入居之。其徒相率僞尊四爲招賢王。李俊順理王。散劫甘州。旋攻固原。千戶所李俊戰死。劉清自靖鹵率衆馳戰。不利。都指揮邢瑞。申澄率各衛軍往捕。戰於城下。兵敗。申澄死之。賊勢大振。民失職者多從之。遠近震駭。五月。敕陝西巡撫都御史陳介。總兵甯遠伯任壽。廣義伯吳琮。巡撫綏延都御史王銳。參將胡愷。各率所部兵討之。秋七月。甯夏兵先至。介等不候。綏延兵自固原急趨蔡祥堡。夜二鼓。營壘始定。軍士勞疲。比曉。卽出架梁。順嶺而行。去石城十里許。賊數千出迎請降。有卒馮信。頗知兵。言於介等曰。賊雖降。誠僞叵測。然我軍夜至。未休暇卽行。且乏水飲。力疲矣。不可戰。姑聽彼請。緩師。徐議攻討。吳琮叱之曰。賊計款我兵至此。豈可退乎。遂麾兵進。賊遁去。至城。遂驅牛羊數千在前。而精兵後繼。時賊尙無兵械。執木梃而鬪。官兵大敗。任壽。吳琮俱退保東山。陳介欲自殺。左右救免。遺失軍資甲械千數。兵有被圍在山者。皆棄之而歸。盡殲焉。賊乃益猖獗。凡係土達。盡逼入城。時截靜甯州道。掠奪甘肅糧運無算。且聲言欲窺陝西。事聞。逮陳介。任壽。吳琮。劉清。馮傑等。下錦衣獄。命都御史項忠。總督軍務。總兵劉玉。參將夏正。率京營兵。并發陝西三邊兵五萬人往討之。起

大理寺少卿馬文升爲都御史。巡撫陝西協勦。冬十月朔。項忠、馬文升先後至固原。明日。於營外得賊所遺書。求宥罪。容居石城。免其徭役。衆知爲緩兵計。置之。忠等議進兵方略。令善畫者圖其山谷形。分六路進兵。忠與文升等屯中路。由莽金佛溝進。延綏巡撫王銳參將胡愷由李俊溝進。伏羌伯毛忠由木頭溝進。右參將夏正由亂麻川進。都指揮姜盛由墨城子進。副總兵林盛由好水川進。都指揮張英由驢母川進。期三日。諸路少出兵。嘗賊且探地勢。後乃大舉。比至城外。賊來迎敵。延綏兵恃勇輕進。失利。明日復會戰。賊佯敗。斂衆入城。伏羌伯毛忠麾其兵進。據木溝。翼日。忠督精銳四千先登。奪山北三峯。又奪山西四峯。與各路官軍會進攻石城。擒斬甚衆。忠爲流矢所中。還至半山而卒。諸軍皆卻。劉玉被圍城下。衆潰。玉中流矢。項忠斬退縮千戶一人以徇。衆懼不敢退。玉得免。項忠以兵敗憂失色。文升曰。勝負常事耳。況賊死亦多。勢已不振。此時黃河未凍。賊不能北徙。無深憂。可徐圖之。朝廷聞毛忠敗死。兵都尙書程信撫甯侯朱永定襄伯郭登等議。恐賊連北寇。奏遣朱永率京兵四萬往益師。朱永欲張大其事。請定賞格。乃行事。下閣議。大學士彭時知賊可平。嫌其張皇。會項忠報軍中事。時曰。賊四出掠。信可慮。今入保山。我師圍之甚固。賊已困。行當就擒矣。京兵何庸再出。大學士商輅亦曰。觀項忠布置。賊不足慮也。程信忿其言不行。出危言曰。項忠軍若敗。必斬一二人。然後發兵去耳。時廷臣羣然附和。謂不出師。必遂失關中。多尤時輕敵。時曰。觀項忠疏。曲折保無虞也。詔問忠須益兵否。忠上疏言京軍怯。不諳戰。益之無補。請命永率精兵五千沿邊西。得賊平報。止不來。未平。則西戮力攻之。信等以忠異己。各煽浮言。會有星孛於台斗。中外洶洶。占者以爲木在秦州。不利西師。忠聞之曰。賊虐害生靈。惡貫滔天。今仗皇威問罪。師直而壯。兵

法曰禁祥去疑。昔李晟討朱泚，焚惑守歲，卒以成功。今類此，乃不待援師至，即督兵攻圍，賊堅壁不出戰。文升與忠謀曰：「賊城中無水，芻粟亦漸乏，若絕其芻汲，則釜魚當自斃矣。」忠然之，令官軍掩捕芻汲者，多被擒。乃知城中無水，忠等日引兵至城下挑戰。至暮引還，以疲之。賊信胡神，神降曰：「若今日出戰，勝則利不勝已矣。」是日賊一出敗歸。始大懼，會調甘州兵三千至，乃益兵攻城。兵已登山，山高險，卒不能克。會日暮，兵在山上者數千人，未能退。方懼，賊亦自畏，詐請降。忠等遂許之，以退山上兵。賊邀忠、文升等詣城下，與語。忠與劉玉皆單騎往，賊數百人擐甲馳遶門外，以示武。文升在溝外，賊來邀，亦赴之。帥數十騎往，叱賊使斂兵。滿四等訴被劉指揮馮參將激變，故乞宥死，請降。忠等言劉、馮二人朝廷已械赴京下獄矣。爾速降，朝廷必宥爾死。又問滿璫曰：「爾被劫入城，非反者。」璫乞命。忠等遂納其降，撫璫歸營，而滿四狐疑，復走上山。明日復設木柵，請戰不降。十一月，諸將相持久，時天寒甚，士卒墮指。忠等言曰：「師老矣，恐生他變。」即黃河凍，儻有外警，我師豈能久駐。儻賊乘間突出，與西戎合，患有不可言者。須急攻城破之，衆不能決。」文升議欲縛木爲廂車，渡濠攻城，衆恐多傷人，不果。然賊見攻具甚懼，漸有出降者。忠等皆給票縱之。歸賊聞出降者益衆，有楊虎狸者最驍悍。滿四所任倚，夜使虎狸出營遠汲，被擒。忠先揚言斬之。虎狸乞命，仍諭之順逆，許以不死。解所束金鈎賜遣之，令爲內應。劉玉刮刀與誓曰：「爾能生擒滿四，或殺之來朝，廷有賞格，必不爾負。」虎狸請自効。且曰：「賊兵精，當以計移其精騎於山上，誘四由東山口出戰，可擒也。」忠等厚撫慰遣之。明日整兵至山下，東山口係延綏兵所守，忠等不欲泄，謂其將曰：「爾暫休，今日余代爾守。」乃令人登高覘之，見一人白馬出城，即滿四也。既而果有精兵駐山上，忠等始信虎狸約，乃伏兵東山口。

滿四出。諸軍競前撲之。伏兵四起。滿四倉皇突陣墜馬。遂就擒。斬首七千餘級。俘獲二千餘。文升欲乘勝擣城。忠恐猝難拔。遂以滿四歸營。乃奏捷。止援兵。明日。城中復立舊達官火敬爲主。忠等乃遣偵夜探城下。賊北行。卽捕。南行勿追。蓋欲散其黨。使易成擒。劉玉欲撤兵退。令賊自解散。忠曰。賊自叛逆以來。前後大小三百餘戰。殺我一伯。三指揮。官軍死者數千人。今若縱之逸去。他日必爲陝患。乃屯兵日覘之。賊度不能支。一夜潰走。散去。因發兵分捕。復斬首數千級。滿四從子滿能者最驍捷。逸去。詢其黨。知入青山洞。乃用火薰之出。亦就擒。并獲家屬百餘口。諸營搜山。又獲賊五百餘人。幼男婦女不下數千人。盡分給諸軍。惟宥楊虎。狸家。文升謂忠曰。石城之險。非盡毀前後所築牆垣。恐後有叛者。必據此爲巢窟。遂令萬人悉平之。立石紀平賊歲。月於山。餘賊百餘人。走據彗箒山。會有報西戎入套。乃留精兵三千人。伺勦餘賊。忠等還固原。時生擒千人。惟滿四火敬等并各罪大者。械送京師。餘八百人就軍中斬之。捷奏至。人始服。彭時料敵明審。鎮靜得體。云。初。忠日披堅於石城下。矢石如雨。略不退怯。文升勸其持重。忠曰。奉命討賊。久無成功。死所甘心。時論偉之。

五年正月。彗箒山賊首毛哈喇被獲。誅之。餘賊解散。忠等下令各歸農業。不問。奏於石城北西安州增設一千戶。所設兵防守之。忠等遂班師。論功陞賞有差。

谷應泰曰。太祖之平陝也。元部落把丹率衆歸附。授平涼衛千戶。以畜牧射獵爲生。頗饒樂足用。而成化初年。把丹孫滿四又以賁雄諸族。然招納亡命。抵觸文網。石勒倚嘯東門。劉淵請歸會葬。蓋未嘗一日忘北徙也。乃以撫臣陳介捕治。逋逃。參將劉清斂錢餽贈。而遂聽李俊之狡黠。劫滿瓚以鼓亂。然不西通甘

肅東屯河套。而但入據石城。憑險負固者。此直緩死之圖。非有啓疆之志也。夫石城去平涼千里。而遙緣峭壁。千仞而上。繩行懸度。四面陡絕。昔人經營以避禍亂者。萬年奄有。氐服。豈居郿塢之中。劉曜入據長安。匪保桃源之境。吾知滿四者。特債轅之小犢。非飛食之攫獸矣。比至陳介出討。賊衆僞降。斥馮信。緩師之謀。用吳琮進兵之策。薄城一戰。軍盡殲焉。假令禁馬。謾之輕出。則街亭無敗。用許歷之據險。則閼與可勝。介實輕敵。罪則奚辭。若夫項忠。身冒矢石。馬文升。躬擐甲冑。圖山谷。則聚米成形。斷樵牧。則困獸自斃。而且金鈎。賜虎狸。刮刀。誓賞格。數月之內。俘獻京師。功垂竹帛。乃知岳節使之神算。竟定湖湘。祭征鹵之奉公。終摧隴蜀者也。然其始。王師屢挫。兵力單微。中外洶洶。頗言星孛不利。西方書生。豈能料敵。而忠以晟討朱泚。熒惑守歲。安拒苻堅。郗部遺罷。豈非意思安閒。知彼知己者耶。總之。辦賊之方。由於將帥。命將之略。本於政府。所喜者。彭時。斷其就擒。商輅。欽其布置。夫論思密勿之地。決勝千里之外。比於真長。料桓溫之必克。郗超。識謝元之有成。猶爲過之。而彼張解。設難發言。盈廷豈非肉食者鄙哉。若夫丹穴之逃。薰以蕭艾。東門之役。撤其關梁。則尤長駕遠馭之規。毋俾易種於茲邑也。

卷四十二

宏治君臣

憲宗成化二十三年九月壬寅。皇太子卽位。詔赦天下。以明年爲宏治元年。妖人李孜省伏誅。妖僧繼曉發原籍爲民。太常卿道士趙玉芝。鄧常恩。謫戍邊。番僧國師領占竹等。悉革職。斥佞豎梁芳。陳喜等。往孝

陵司香先朝妖佞之臣。放斥殆盡。繼曉尋伏誅。冬十月。召致仕南京兵部尚書王恕爲吏部尚書。初。太監懷恩以直道屏居鳳陽。上素知之。至是召還。恩言大學士萬安諛佞。王恕剛方。請上去安而召恕。遂有是命。恕至京。庶吉士鄒智往語之曰。三代而下。人臣不得見君。所以事事苟且。公宜先請見君。卽時政不善者。歷陳上前。庶其有濟。一受官職。更無可見時矣。恕善其言。時恕負重望。其居家宰銓政多釐正焉。十一月。大學士萬安罷。先是安結萬貴妃兄弟。進奸僧繼曉以固其寵。與李孜省結納。表裏奸弊。上在東宮。稔聞其惡。至是於內中得一篋。皆密術也。悉畧曰。臣安進。上遣懷恩持至閣下曰。是大臣所爲乎。安漸汗不能出一語。已而科道交章劾之。遂命罷去。安在道。猶夜望三台星。冀復進用。尋卒。禮部右侍郎邱濬進所著大學衍義補。擢禮部尚書。先是濬以真西山大學衍義有資治道。而治國平天下之事缺焉。乃采經傳子史有關治國平天下者。分類彙集。附以己意。名曰大學衍義補。至是書成。進之。上覽之。甚喜。批答曰。卿所纂書。考據精詳。論述該博。有輔政治。朕甚嘉之。賜金幣。遂進尚書。仍命禮部刊行。十二月。加祀先師孔子籩豆舞佾。

孝宗宏治元年春正月。召南京兵部尚書馬文升爲左都御史。文升陛見。賜大紅織金衣一襲。蓋上在東宦時素知其名故也。文升感殊遇。自奮勵。知無不言。閏正月。詔天下舉異才。二月上耕藉田畢。宴羣臣。教坊以雜伎承應。或出褻語。文升厲色曰。新天子當知稼穡艱難。豈宜以此瀆亂宸聰。卽斥去。時山陵未畢。而中官郭鏞請選妃以廣儲。謝遷力言不可。文升主之。御史以糾儀下獄。文升謂卽位之初。不宜輒罪言官。於是得釋。時論偉之。三月上視學。釋奠先師。吏部尚書王恕請加禮於孔子前。特用幣。改太牢。

起用謫降主事張吉。王純中書舍人丁璣。進士敖毓元。李文祥。先是五人竝以言事遠謫。南京吏部主事儲瓚上言。五人者既以直言徇國。必不變節辱身。今皆棄之嶺海之間。毒霧瘴氣。與死爲伍。情實可憫。乞取而寘之風紀論思之地。則言論風采。必有可觀。與其旋求敢諫之士。不若先用已試之人。上命吏部皆起用之。少詹事楊守陳上開講勤政疏。上嘉之。初開經筵。講畢。賜講官程敏政等茶及宴。上皆呼先生而不名。吏部尚書王恕上言。正統以來。每日止一朝。臣下進見。不過片時。聖主雖聰明。豈能盡察。不過寄聰明於左右。左右之人。與大臣相見者不多。亦豈能盡識大臣賢否。或得之毀譽之言。或出於好惡之私。欲察識之真。必須陛下日御便殿。宣召諸大臣。詳論治道。謀議政事。或令其專對。或閱其章奏。如此非惟可以識大臣。而隨材任使。亦可以啓沃聖心。而進於高明矣。馬文升條時政十五事。曰。選廉能以任風憲。禁撫拾以戒貪官。擇人才以典刑獄。申命令以修庶務。逐術士以防煽惑。責成效以革奸弊。擇守令以固邦本。嚴考課以示勸懲。禁公罰以勵士風。廣儲積以足國用。恤士人以防後患。清僧道以杜遊食。敦懷柔以安四裔。節費用以蘇民困。足兵戎以禦外侮。上嘉納之。悉施行於內。節用一條云。一應供應之物。陛下量減一分。則民受一分之賜。言尤剴切。夏四月。右庶子張昇劾大學士劉吉。不報。先是。大學士萬安尹直既劾罷。吉附阿科道。建言當超遷。待以不次之位。昇遂上疏。言應天之實。以人才爲先。人才以輔臣爲先。初科道以萬安。劉吉。尹直爲言。安與直以次罷遣。惟吉獨存。遂建言超遷科道。自是無復肯言。而羣臣靡然附之。李林甫之蜜口劍腹。賈似道之牢籠言路。吉實合而爲一。請亟遣斥。以應災異。以回天心。不報。御史魏璋附吉劾昇。遷南京工部員外。六月。王恕上言。禁文職奪情起用上從之。冬十二月。

徽州教諭周成進治安備覽。謂商鞅有見於孔門立信之說。少詹事程敏政摘其狂妄。置不問。

二年春正月。左贊善張元禎上疏言定聖志。一聖敬。廣聖知。勸行王道。反覆萬言。上嘉納之。二月。御史湯鼎壽州知州劉槩下獄。先是萬安劉吉尹直在政府。嘗語鼎壽朝廷不欲開言路。鼎卽以其言劾之。已而安直皆免官。鼎與李文祥等以爲小人退則君子進。雖劉吉在。不足慮也。吉使客徐鵬啗御史魏璋以殊擢。使伺鼎。鼎家壽州。知州劉槩與書言夢一人牽牛陷澤中。鼎手提牛角引之而上。人牽牛象國姓。此國勢瀕危。賴鼎復安之兆也。鼎大喜。出書示客。璋以劾之。謂其妖言誹謗。下錦衣獄。辭連庶吉士鄒智。智身親三木。僅餘殘喘。神色自若。無所曲撓。議者欲處以死。刑部侍郎彭韶辭疾不爲判案。獲免。左遷廣東石城吏目。大理寺評事夏鍬上言。主事李文祥。庶吉士鄒智。御史湯鼎等皆以言獲罪。實大學士劉吉誤陛下。豈知劉吉之罪不減萬安。尹直乎。疏留中。鍬謝病歸。五月。以刑部侍郎彭韶爲吏部左侍郎。王恕爲尙書。得韶爲貳。皆不避權貴。請謁路絕。六月。京城及通州大雨。水溢壞廬舍。人多溺死。韶求直言。兵部尙書馬文升上疏言正心謹始。以降繼述。禁奇巧。卻珍貢。慎毀譽。重諮詢。抑外戚。開言路。所司議行之。三年春二月。中官乞鷹坊牧馬場千頃。戶部尙書李敏言。場止二百餘頃。餘皆民業。安得奪耕種之地。以爲飛走之所。上從之。夏四月。定預備倉。冬十一月。有星孛於天津。詔大臣極言時政得失。吏部侍郎彭韶言正近侍。慎官爵。厚根本。減役錢。上嘉納之。禮部尙書耿裕率羣臣條時政七事。上謂有防微杜漸之意。左侍郎倪岳上言。當今民日貧。財日匱。宜節儉以爲天下先。又言減齋醮。罷供應。省營繕。上俱採納焉。

四年春正月。南京國子祭酒謝鐸上言。修明教化六事。擇師儒以重教化之職。慎科貢以清教化之原。正祀典以端教化之本。廣載籍以永教化之基。復會饌以嚴教化之地。均撥歷以拯教化之弊。三月。御史鄒魯誣奏刑部尚書何喬新受餽遺下獄。先是喬新每重王恕。不平劉吉。吉銜之。會鄒魯謀陞大理寺丞。喬新薦魏紳補之。吉遂嗾魯有是奏。禮部尚書耿裕上疏。禁自宮。從之。秋八月。吏部尚書王恕懇疏求致仕。不許。恕時有建白。衆議謂業已行矣。恕言天下事苟未得其當。雖十易之不爲害。若謂已行不及改。則古之納諫如流。豈皆未行乎。恕遇事敢言。有不合。卽引疾求退。上每溫詔留之。九月。大學士劉吉罷。時上欲封張皇后弟伯爵。吉言必盡封周王二太后家。乃可。上惡之。使中官至其家。勒令致仕去。初。吉屢被彈章。仍進秩。人呼爲劉縣花。謂其愈彈愈起也。或告吉監中老舉人爲之。吉因奏舉人三次不中者。不許會試。至是禁除。冬十月。命禮部尚書邱濬兼文淵閣大學士。

五年春二月。右諭德王華上疏略曰。每歲經筵不過三四御。而日講或閒旬月始一行。則緝熙之功。毋乃或閒。雖聖德天健。自能乾乾不息。而宋儒程頤所謂涵養本源。薰陶德性者。必接賢士大夫之時多。宦官宮妾之時少。後可免於一暴十寒之患。上嘉納之。三月。巡撫保定都御史史琳奏。宦戚假供應。奪民園。詔罷還之。夏四月。大學士邱濬上疏言時政之弊。大略言陛下端身以立本。清心以應務。謹好尚。勿流於異端。節財費。勿至於耗國。公任用。勿失於偏聽。禁私謁。以肅內政。明義理。以絕奸佞。慎儉德。以懷永圖。勤政務。以宏至治。庶可以回天災。消物異。帝王之治可幾也。因擬爲二十二條。以爲朝廷抑遏奸言。杜塞希求。節財用。重名器之助。凡萬餘言。上覽奏甚悅。以爲切中時弊。太監李廣以城垣工完。乞恩量加內

官俸級。王恕力持不可止之。五月遣廷臣贖內帑銀賑杭嘉湖大水。冬十月。中官傳旨以通政經歷高祿爲本司參議。吏部尙書王恕侍郎周經執奏止之。十一月。停止生員吏典開納事例。王恕言永樂宣德正統閒。天下亦有災傷。各邊亦有軍馬。當時未有開納事例。糧不闕。不足軍民不聞困弊。近年以來。遂以此例爲長策。旣以財進身。豈能以廉律己。欲他日不貪財害民。何由而得乎。上從之。

六年春正月。詔考察官未及三年被黜者。復其官。從大學士邱濬之言也。三月。亢旱。求直言。吏部左侍郎張悅上弭災五事。并修德圖治二疏。上嘉納之。吏部尙書王恕致仕。時大學士邱濬與恕俱陪太子太保。一日。內宴。濬以內閣位。恕上。恕以己冢宰。不宜居禮部尙書下。頗有言。會太醫院判劉文泰援例求進事。下吏部。格不行。文泰訐奏。恕變亂選法。及不當令人作大司馬。王公傳詳述留中之疏。濬謂恕賣直沽名。恕上疏自劾。乃下文泰獄。恕求去。益力。詔允之。命乘傳歸。於是言官交章劾濬媚嫉妨賢。上不聽。秋七月。京師大雨雹。禮部尙書倪岳疏弭災急務。勸上勤聖學。開言路。止無功之賞。停不急之役。黜奸貪。進忠直。上嘉納之。

七年冬十月。西域進獅子。禮部尙書倪岳言。獅者外域之獸。真僞不可知。使真。非中國宜畜。非真。無爲外域所笑。詔還之。

八年三月。中官傳旨。命內閣撰三清樂章。大學士徐溥等上言。三清乃邪妄之說。黷於祭祀。時謂勿欽。且設內閣者。實欲其議政事。論經史。弼正得失。柰何阿順邪說。以取容悅也。乃止。十月。詔取番僧領占竹。至京。禮部尙書倪岳執奏。給事柴昇上言。其誕妄。引孟軻韓愈爲證。反覆數千言。上讀之而悟。詔中止。天

下誦之。十二月倪岳類奏各處災異。上令諸廷臣同加修省。先是四方報災異。禮部類集。凡歲終一覆。以爲故事。岳乃以日月先後彙分條析。末復援經史懇切爲上言之。戶部主事胡燿上疏言災變異常。皆由奸宦楊鵬。李廣所致。不報。

九年閏三月。諭德王華日講文華殿。講唐李輔國與張后表裏用事。時內侍李廣方貴幸。招權納賄。華諷上。上樂聞之。命中官賜食。六月。兵部尙書馬文升請飭武備。秋八月。大學士徐溥。劉健。李東陽。謝遷疏諫燒煉齋醮。時中官李廣以左道被寵。溥等力言其邪妄。引唐憲宗。宋徽宗爲戒。上嘉納之。冬十月。中使取寶坻港銀魚。并取麻峪山銀礦。橫索害民。順天巡撫都御史屠勳疏言不可。詔戒中使俱止之。十年二月。上屢遊後苑。侍講王鏊。侍經筵。講文王不敢盤於遊田。上悟。納之。召李廣等戒之曰。今日講官所指。蓋爲若輩。好爲之。竟能遊。三月。上御文華殿。召大學士徐溥。劉健。李東陽。謝遷議政事。賜茶而退。東陽謂自天順末至今三十餘年。嘗召內閣。不過數語。卽退。是日經筵罷。有此召。因得見帝。天姿明睿。廟算周詳。云。五月。京師風霾。各省地震。詔求直言。祠祭郎中王雲鳳上言。納忠言。罷左道。齋醮。採辦。傳奉諸事。上嘉納之。秋八月。上欲施恩后家。外戚張氏有河閒賜地四百頃。欲并其旁近民田千餘頃。得之。且乞畝加稅銀二分。戶部尙書周經言。河閒地多沮洳。比因久旱。貧民卽退灘地耕之。遇潦輒沒。卽欲加稅。將貽無窮之害。不可。疏三四上。後有雄縣退灘地獻爲東宮莊者。上因經前奏。皆抵之罪。一時貴戚近侍有所陳請。一裁以法。皆斂不得肆。十一月。詔取大倉銀三萬兩。周經言。皆係小民脂膏。上遂止。十一年秋七月。以浙江大水。戶部尙書周經請停織造。從之。九月。清甯宮災。敕羣臣修省。大學士李東

陽上疏弊政。上嘉納之。以少監莫英等督京通倉。周經言其弊。不納。冬十月。太監李廣有罪自殺。廣以左道見寵。任權傾中外。會幼公主痘殤。太皇太后歸罪於廣。廣懼。飲鴆死。上命搜廣家。得納賄簿籍。中言某送黃米幾百石。某送白米幾千石。上曰。廣食幾何。而多若是。左右曰。黃米。金也。白米。銀也。上怒。籍沒之。已而太監蔡昭請廣祭葬。祠額許之。閣臣言其不可。上命止。予祭。十一月。下詔寬恤天下。議修清甯宮。兵部尙書馬文升請發內帑。免征派。停止四川採木之擾。從之。

十二年春正月。給事中楊廉疏講書宜用大學衍義。從之。夏五月。吏部尙書屠鏞疏請禁內降弭災變。大意言天下士事詩書而躬案牘。積數十年不可得而奔競之士。或緣技藝蒙幸。如拾芥。然不可以爲訓。又曰。今日之傳奉。卽漢所謂西邸之爵。唐所謂斜封之官。宋所謂內批之降。陛下當遠宗堯舜。豈可襲末世之弊轍乎。下所司知之。六月。刑部侍郎屠勳勘壽甯侯與河間民構田事。直田歸民。勳上言食祿之家。不言利。況母后誕毓之鄉。而與小民爭尺寸地。臣以爲不可。上嘉納從之。秋九月。南京禮部尙書謝綬因災異。率九卿陳時政二十八事。下所司議行之。冬十一月。清甯宮興工。詔番僧入宮慶讚。吏部尙書屠鏞上疏諫。甚剴切。末云。自今以後。乞杜絕僧道。停止齋醮。崇聖賢之正道。守祖宗之家法。使天下後世有所取則。上悅從之。

十三年春正月上。以法司律例繁多。命刑部尙書白昂會九卿大臣。刪定畫一。頒中外行之。大學士劉健上言。自古願治之君。必早朝晏罷。日省萬幾。祖宗黎明視朝。每日奏事二次。邇者視朝大遲。散歸或至昏暮。四方朝貢。奚所瞻觀。矧今各邊啓釁。四方薦災。尤爲可慮。怠荒是戒。勵精是圖。庶可以回天意。慰人

心上嘉納之。二月命戶部侍郎許進往勘河間貴戚田莊。進會巡撫高銓勘之。寃聲撼野。至擁州縣吏不得行。進遽欲執以復命。銓曰。若是固爲民至意。萬一不測。如民重得罪。何。請勘實以聞。上雅愛民。必不忍奪其業。以利左右。進以爲然。遂勘實。上疏係民業。宜予民。上從之。三月。給事中曾昂上言。以邊方調度日煩。請令諸布政司公帑積貯。及均徭羨餘。盡輸大倉。戶部尚書周經言。用不足者。蓋以織造賞賚。齋醮土木之故。若一切節省。自宜少裕。必欲盡括天下之財。豈藏富於民之意乎。乃止。衆皆服其議。夏五月。吏部尚書屠鏞。戶部尚書周經。各以星變乞致仕。許之。翰林檢討劉瑞上言八事。崇聖德。親儒臣。嚴近習。全孝思。旌直言。勵士風。畏小民。飭邊備。上嘉納之。六月。陝西巡撫都御史熊翀得玉璽來獻。禮部尚書傅瀚言。以史傳諸書考之。形制篆刻皆不類。其爲贗作無疑。即使非贗。人主受命在德。不在璽。上迺屬庫藏之。

十四年春正月。陝西地震。南京僉都御史林俊上疏。歷述漢晉以來宮闈內寺柄臣之禍。請減齋醮。清役占。汰冗食。止工作。省供應。節賞賜。戒逸欲。遠佞幸。親正人。兵部尚書馬文升上言。祇畏變異。痛加修省。勸上積金帛。以備緩急。罷齋醮。以省浪費。止傳奉之官。禁奏請之地。將陝西織造。絨褐。內臣早取回京。以蘇軍民之困。上嘉納之。禮部尚書傅瀚率九卿疏弭災時政三十一事。不報。瀚復言。民心易感。在結之以恩。天意可回。在應之以實。屬者所陳。當如拯救。猶恐不及。而側聽彌月。未賜宸斷。何以爲理。疏入。從之。時南北九卿上疏言事。俱報可。三月。保定撫臣獻白鴉。以爲瑞。禮部尚書傅瀚劾其不當。奏詔斥遣之。秋九月。詔遣中官王端往武當設像修齋。大學士劉健。吏部尚書倪岳。兵部尚書馬文升各疏諫。上遽止。

冬十月改馬文升爲吏部尙書

十五年正月大計天下吏上召馬文升至煖閣論之曰天下覲吏畢集卿其用心採訪毋縱毋枉以彰黜陟文升頓首曰陛下圖治若此宗社福也敢不仰承乃令中貴人掖之下陛自是汰不職者二千餘人皆當召兩廣總督劉大夏爲兵部尙書大夏素以安內攘外爲己任命下人心翕服先是大夏在廣東西一歲再求去皆不許既廷謝上御帷殿召問之曰朕素用卿而數辭疾何也大夏對曰臣老且病今天下民窮財盡萬一不虞責在兵部臣自度力不足辦故辭耳上默然居數日復召問徵斂俱有常何至今而獨言民窮財盡也大夏對曰正謂其不盡有常耳他固未暇論卽臣在廣西取鐸木廣東市香藥費固以萬計上曰若嚮者言之固已停止矣其他徵斂可一一議革也上一日問諸衛所卒強勇可用否對曰向者臣固言民窮而卒殆甚焉何以作其銳上曰在衛有糧戍征有行糧何乃窮也對曰江南困轉漕江北困京操他困又不止此且所謂月糧行糧者半與其帥共之能無窮耶上歎息曰朕在位久不能知何稱爲人主乃令九卿大臣各以其職言軍民弊政而擇行之二月吏部尙書馬文升上言三事一曰裁冗官言近年以來傳奉等官將有八百餘員每歲實支米不下萬石能減一官則省一官之俸寬一分則民受一分之賜二曰杜奔競言朝覲旣已去之又復留之故覲覲之徒干求復進陛下以此不職之數人可惜則天下千百萬困苦之蒼生獨不可惜乎三曰革濫進邊圍多警許生員納馬入監有七千餘名川陝荒歉守臣又具奏上糧入監通前共有數萬餘人大害選法人民受害上皆納之冬十月上欲於近畿地方團操人馬爲左右翼以問劉大夏對曰京西保定地方獨設都司統五衛仰思祖宗亦卽此意遂將

保定兩班軍萬人發回衛團操。乃有造飛語帖宮門以誣大夏者。上召大夏示之曰：宮門豈外人可到。必內臣忿不得私役軍爲此耳。上又問大夏兵餉何以常乏。大夏意欲削鎮守中貴人。對曰：臣無暇及他鎮。卽臣在廣而廣之會城撫按總兵三司不能敵一中貴人。餉何以不乏。上曰：然。第祖宗來設置此輩已久。安能遽削之。今必令廉如鄧原麥秀者而後補。不然姑闕焉可也。上復語大夏諸司言弊政詳矣。而不及御馬監光祿寺者何。夫弊莫甚於二曹。大夏曰：上悉之。幸甚。在獨斷而力行之耳。先是光祿供奉內府自有常額。成化以來內員漸繁。常供不足。乃責京師邸戶辦之。甚苦。至是大夏因言光祿日辦煩費。殺牲數百。旣損民財。復虧愛物之仁。上爲惻然。卽敕兵部侍郎同給事御史清理裁革。光祿卿艾璞曰：劉東山此奏。歲省光祿金錢八十萬。古稱仁人之言其利溥。此之謂與。然中官因是愈側目大夏矣。

十六年春二月。敕河南取牡丹三十本。巡撫都御史孫需上疏不可。上命止之。夏五月。京師大旱。兵部尙書劉大夏因言兵政之弊。未能悉革。乞退不允。令開陳所言弊端。大夏條上十事。上覽奏嘉納。命所司一一行之。上又召大夏於便殿。諭之曰：事有不可。每欲召卿議。又以非卿部事而止。今後有當行當罷者。卿可揭帖啓朕。大夏對曰：不敢。上問何也。曰：臣下以揭帖進。朝廷以揭帖行。何異前代斜封墨敕。陛下宜遠法帝王。近法祖宗。事之可否。外付府部。內咨閣臣可也。如用揭帖。上下俱有弊。且非後世法。臣不敢效。順上稱善。又嘗問天下何時太平。朕如何得如古帝王。對曰：求治不宜太急。凡用人行政。卽召內閣并執政大臣面議行之。但求順理。以致太平。上曰：劉健嘗薦劉宇才堪大用。朕觀宇小人。內閣亦豈盡可託。時刑部尙書閔珪持法忤旨。上與大夏語及之。而怒。大夏曰：人臣執法。不過效忠朝廷。珪所爲無足異。上曰：

古亦有之乎。對曰：舜爲天子，皋陶爲士，執之而已。上默然。徐曰：珪第執之過耳。老成人何可輕棄。竟允珪請。一日，上召大夏入御榻前，上左右顧近侍內臣退避去，奏事畢復來。大夏對久，欲起不能。上命太監李榮掖大夏出。

十七年春正月，內旨修建壽塔於朝陽門外。大學士劉健疏諫止之。三月，內旨行河南取樂工。巡撫都御史韓邦問疏諫止之。夏五月，敕吏部都察院比年考察朝覲官，據撫按語多失實，務備細參訪，精白一心，秉持公道。庶幾澤被生民，上回天意，其欽承之。六月，小王子寇宣府，劉大夏請屯兵喜峯口，燕河營以備之。太監苗達謀帥師擣其營，上召大夏問以王越威甯之捷。大夏曰：臣聞之從征將士，當時所俘獲婦稚十數耳。幸而大寇方深入，不相值，值之則無噍類矣。上曰：卽爾，太宗何以屢得志。大夏曰：陛下神武，故不後太宗，而將領人馬不能什二三擬也。且其時淇國公一小違節制，而舉十萬衆，悉委之沙漠，柰何。易言之，度今上策，惟有守耳。而戴珊亦從旁贊其語。上遽曰：微二人，吾幾爲人誤。事遂止。珊亦以材見知。上御文華，有所召對，必大夏再宣，必及珊。秋九月，清甯宮未完，旨下兵部撥軍工萬人。劉大夏知工少人多，中官有所利爲此也。上言減去十分之五。督工者訴於上，上令內閣擬旨切責之。大學士劉健曰：愛惜軍人，兵部職也。大夏每以老辭位，溫旨勉留，猶未已。若切責旨下，彼將以不職辭。上欣然納之。用軍夫卒如所裁之數。召大學士劉健等議日講事。上曰：講書須推明聖賢之旨，直言無諱。若恐傷時，過爲隱覆不盡，雖日進講，亦何益乎。且先生輩與翰林諸官是輔導之職，皆所當言。健對曰：臣等若不敢言，則其餘百官無復敢言者矣。上曰：然。謝遷曰：聖明如此，臣等敢不盡心。諸臣叩頭出。十一月，巡撫保定都

御史王璟奏請免立皇莊等六事。上納之。

十八年春正月。上召兵部尚書劉大夏。左都御史戴珊面議政事。議畢。上曰。述職者集矣。大臣皆杜門。若二卿雖開門延客。誰復以賄賂通也。因各手白金一錠。賜之曰。小佐爾廉。且屬無廷謝。恐他人或觖望。一日。欲有召。大夏在班。而上不之見。次日。諭大夏。吾欲召卿。卿不在班。恐不免御史糾。故已之。珊嘗以老病乞骸骨。不允。屬大夏一從。與上謂珊。卿何亟求去。珊不敢對。大夏爲言。珊實病。上曰。主人留客。堅客且爲強留。獨不能爲朕留邪。且天下尙未平。何忍舍朕。已。泫然者久之。珊與大夏皆叩首泣。珊出而語大夏曰。死此官矣。巡撫保定都御史王璟疏乞罷諸內璫。田盡歸之民。下部知之。二月。上諭各司大小諸臣曰。朕方圖新理政。樂聞讜言。除祖宗成憲定規。不可紛更。其餘事關軍民利病。切於治體。但有可行者。諸臣悉心開具以聞。三月。戶部主事李夢陽上書指斥弊政。反覆數萬言。內指外戚壽甯侯尤切。至疏入。皇后母金夫人及張鶴齡深恨之。日泣訴於上前。上不得已。下夢陽獄。科道交章論救。金夫人猶在上前。泣涕求加重刑。上怒。推案起。旣而法司具獄詞以請。上徑批夢陽復職。罰俸三月。他日上遊南宮。二張夜入侍酒。皇后金夫人亦在上。獨召大張膝語。左右莫聞。知第遙見大張免冠觸地。蓋因夢陽言罪壽甯也。旣而劉大夏被召便殿。奏事畢。上曰。近日外議若何。大夏曰。近釋李夢陽。中外懽呼。至德如天地。上曰。夢陽疏內張氏二字。左右謂其語涉皇后。朕不得已。下之獄。比法司奏上。朕試問左右作何批行。一人曰。此人狂妄。宜杖釋之。朕揣知此輩欲重責夢陽至死。以快宮中之忿。朕所以卽釋復職。更不令法司擬罪也。大夏頓首謝曰。陛下行此一事。堯舜之仁也。太常寺卿張元禎上疏勸經筵講太極圖。西銘性理諸書。

上急索太極圖以觀曰。天生斯人以開朕也。五月帝不豫。庚寅召大學士劉健等受顧命。健等入乾清宮。至寢殿。上便服坐榻中。健等叩頭。上令近前。健等直叩榻下。上曰。朕承祖宗大統。在位十八年。三十六歲矣。乃得此疾。殆不能興。故與諸先生相見時少。健等曰。陛下萬壽無疆。安得遽爲此言。上曰。朕自知之。亦有天命。不可強也。因呼水漱口。掌御藥太監張楸勸上進藥。不答。上又曰。朕爲宗祖守法度。不敢怠荒。然亦諸先生補助之力。因執健手。若將永訣者。上又曰。朕蒙皇考厚恩。選張氏爲皇后。生東宮。今十五歲矣。尙未選婚。社稷事重。可卽令禮部舉行。皆應曰。諾。時諸內臣羅跪榻外。上曰。受遺旨。太監陳寬扶案。季璋捧筆硯。戴義就前書之。上曰。東宮聰明。但年幼。好逸樂。諸先生須輔之以正道。俾爲令主。健等皆叩首曰。臣等敢不盡力。諸臣出。翼日上崩。

谷應泰曰。三代而上。成康啓甲。尙矣。降是。其漢文。宋仁乎。乃予所聞於明之孝宗。近是人主在襁褓。則有阿姆之臣。稍長。則有戲弄之臣。成人。則有嬖倖之臣。卽位。則有面諛之臣。千金之子。性習驕佚。萬乘之尊。求適意快志。惡聞己過。宜也。漢文止輦受言。張釋之。馮唐皆以片言悟主。宋仁聞天章閣圖治。韓范富歐。無不先後登朝。孝宗之世。明有天下百餘年矣。海內又安。戶口繁多。兵革休息。盜賊不作。可謂和樂者乎。而孝宗恭儉仁明。勤求治理。置亮弼之輔。召敢言之臣。求方正之士。絕嬖倖之門。卻珍奇。放鷹犬。抑外戚。裁中官。平臺煖閣。經筵午朝。無不訪問疾苦。旁求治安。非如曲江興慶賞花釣魚。歌鳳凰於卷阿。醉豐草於淇露。流連清讌。擬迹成周。恣詠太平。比蹤虞德者也。當是時。冰鑑則有王恕。彭韶。練達。則有馬文升。劉大夏。老成則有劉健。謝遷。文章則有王鏊。邱濬。刑憲則有閔珪。戴珊。夫孔甲好龍。真龍降象。孝武好馬。天

馬西來。上所好者。下有甚焉。延攬之門開。外吏封還誥敕。誹謗之禁疎。小臣執奏椒姻。黃鐘大呂。能生瓦石之音。帝室皇居。不棄樞樞之器。雍雍濟濟。斯爲盛矣。然而郭鏞。李廣。以中宮進。壽甯二張。以外戚進。燒煉齋醮。以方士進。番僧慶讚。以沙門進。夫宏恭石顯。已在病已之朝。廖光防躡。不絕馬鄧之世。牛服玉杯。能號後元。譯書天竺。進自永平。蓋盛陽之月。必有伏陰。舜禹之朝。不無共鯀。得志則虎變。失志則鼠伏。用之則風生。不用則泥蟠。是故管隲在朝。刁開難亂。孔明作相。黃皓無權。世豈有無小人之日哉。人君進賢退不肖之閒。安危倚伏。不可不審也。聞帝與張后情好甚篤。終身鮮近嬪御。琴瑟專一。出自掖庭。元鳥呈祥。遂在中宮。尤古今僅事云。

卷四十三

劉瑾用事

武宗正德元年春正月。以神機營中軍二司內官太監劉瑾管五千營。瑾陝西興平人。故姓淡。景泰中。自宮爲劉太監名下。因其姓。成化時。領教坊見幸。宏治初。擢茂陵司香。其後得侍東宮。以俳弄爲太子所悅。太子卽位時。瑾掌鐘鼓司。鐘鼓司內侍之微者也。瑾朝夕與其黨八人者。爲狗馬鷹犬歌舞角觝以娛帝。帝狎焉。八人者。馬永成。高鳳。羅祥。魏彬。邱聚。谷大用。張永。其一瑾。瑾尤獐給。頗通古今。常慕王振之爲人。至是漸用事。六月辛酉。雷震郊壇禁門。太廟脊獸。奉天殿鷓鴣。吻。大學士劉健。謝遷。李東陽。聞帝與八人戲亡度。連疏請誅。略曰。政在於民生國計。則若罔聞。知事涉於近倖貴戚。則牢不可破。臣等叨居重地。徒

擁虛銜。或旨從中出。略不與聞。或衆所擬議。竟行改易。若以臣言爲是。則宜傳賜施行。臣等言非。亦宜明加斥責。而往往留中不發。視之若無。臣等因循玩愒。竊祿苟容。旣負先帝。又負陛下。語甚切直。不報。冬十月。戶部尙書韓文每退朝。對屬言。輒泣下。郎中李夢陽曰。公爲國大臣。義同休戚。徒泣何益。文曰。計安出。夢陽曰。比言官章入。交劾諸內侍。章下閣。閣下持劾章甚力。公誠及此時。率諸大臣死爭。閣老得諸大臣持劾章必益堅。去瑾輩易耳。文捋鬚昂肩。毅然曰。是也。卽事勿濟。吾年足死矣。不死不足以報國。明日早朝。文密叩閣老。閣老許之。倡諸大臣。諸大臣皆應諾。文退。乃囑夢陽具疏草。文讀而芟之曰。是不可。文。文恐上不省。不可多多。覽勿竟也。疏具。遂合九卿諸大臣上言曰。臣等待罪股肱之列。值主少國疑之秋。仰觀乾象。俯察物議。至於中夜起歎。臨食而泣者屢矣。臣等伏思。與其退而泣歎。不若昧死進言。此臣之志。亦臣之職也。伏覩近歲以來。太監馬永成。谷大用。張永。羅祥。魏彬。劉瑾。邱聚。高鳳等。置造巧僞。淫蕩上心。或擊毬走馬。或放鷹逐兔。或俳優雜劇。錯陳於前。或導萬乘之尊。與人交易。狎瞻嫖褻。無復禮體。日游不足。夜以繼之。勞耗精神。虧損聖德。遂使天道失序。地氣靡甯。雷異星變。桃李秋花。考厥占候。咸非吉祥。緣此輩細人。唯知蠱惑君上。以行私而不知皇天眷命。祖宗大業。皆在陛下。一身高皇帝艱難百戰。取有四海。列聖繼承。傳之陛下。先帝臨崩。顧命之語。陛下所聞也。柰何姑息羣小。置之左右。爲長夜之游。恣無厭之欲。以累聖德乎。前古閹宦誤國。漢十常侍。唐甘露之變。是其明驗。今永成等罪惡旣著。若縱而不治。爲患非細。伏望陛下。將永成等縛送法司。以消禍萌。疏入。上驚泣不食。諸閣大懼。先是。科道交章請除羣奸。閣議持章不肯下。諸閣已寤。相對涕泣。會諸大臣疏。又入。於是上遣司禮監八人。齎詣閣議。一日三至。

健等卒持不下。內司禮監太監王岳者亦東宮舊臣也。素剛直。頗惡其儕所爲。獨曰。閣議是。明日。忽有旨召諸大臣入。大臣有歸咎韓文者。文不應。至左順門。太監李榮手諸大臣疏曰。有旨。諸大臣愛君憂國。言良是。第奴儕侍上久。不忍卽置之法。幸少寬之。上自處耳。衆相顧莫敢出一語。韓文曰。今海內民窮盜起。天變日增。羣小輒導上游宴無度。荒棄萬幾。文等備員卿佐。何忍無言。榮曰。疏備矣。上非不知。第欲稍寬之耳。上固有處。吏部侍郎王鏊曰。脫不處。柰何。曰。是在榮。榮頸裏鐵邪。敢誤國。是日。諸閣益窘。自求安置。南京而閣議又持不從。時王岳與司禮太監范亨。徐智等亦助文等密奏。上上不得已允之。待明旦發旨。捕瑾等下獄。而吏部尙書焦芳者故與瑾善。遂以所謀泄之。瑾瑾等亦廉知王岳密奏事。八人者。遂夜趨上前環跪哭。以頭搶地曰。微上恩。瑾等磔餒狗矣。上色動。瑾輒進曰。害瑾等者岳也。帝曰。何也。曰。岳東廠也。外謂諫官諸先生有言第言而閣議時岳又獨稱是。此何情也。夫狗馬鷹犬岳買獻否。而獨咎瑾等。帝怒曰。吾收岳矣。瑾曰。狗馬鷹兔何損萬幾。今左班官敢譁無忌者。司禮監無人也有則惟上所欲爲。誰敢言者。上怒。是夜立命劉瑾入掌司禮監。兼提督團營。邱聚提督東廠。谷大用提督西廠。張永等竝司營務。分據要地。瑾夜傳命榜岳亨智逐之南京。而外廷未知也。晨伏闕。則旨下。健等知事不可爲。各上疏求去。瑾矯詔勒健遷致仕。惟東陽獨留。蓋前閣議時健嘗推案哭。遷亦嘗瑾等不休。惟東陽稍緘默。故得獨留。東陽上言臣等三人責任一同。而獨留臣。將何辭以謝天下。不允。健遷瀕行。東陽祖道。歎歔泣。健正色曰。何用今日哭爲。使當日出一語。則與我輩同去耳。東陽無以應。瑾尋矯詔追殺岳亨於途。擊折徐智背。得免。初舉朝必欲誅瑾。兵部尙書許進曰。此屬得疎斥足矣。若峻其事。恐有甘露之變。旣而果如進言。刑科

給事中吳紳。山西道御史劉玉俱上疏論劉瑾佞幸。棄逐顧命大臣。乞留劉健。謝遷。而以瑾正典刑。上怒。下獄。斥爲民。瑾旣得志。於是內揣合帝意。外日以深文誅求諸臣。使自救不暇。而莫敢進言。帝喜。益謂瑾可委任矣。瑾又素善矯飾。谷大用。用鎮守太監。言請臨清開皇店。瑾捕獻計者罪之。馬永成。以私故欲陞錦衣百戶邵琪。瑾持不可。邱聚。主東廠。頗恣肆。偶忤瑾。瑾發其事。調畱都。王琇。建新第於大內。誘上居之。因奏令賈人居積。代諸計吏輸物內帑。多獲羨餘利。瑾聞。怒曰。安有天子而攬納稅糧者乎。罪其人。事得寢。其善矯誣如此。以吏部尙書焦芳兼文淵閣大學士。入閣辦事。芳潛通瑾黨。瑾遂引芳入閣。表裏爲奸。凡變紊成憲。桎梏臣工。杜塞言路。酷虐軍民。皆芳導之。欽天監五官監候楊源。上言。八月初。火角及心宿中星搖動。天璇。大璣。天權星不明。乞親元老大臣。罷去內侍寵倖。安居深宮。絕嬉戲。禁游獵。罷弓馬。嚴號令。毋輕出入。章下禮部。左都御史張敷華。上言。政令紛拏。百臣爭之不足。數幸豎壞之有餘。工部尙書楊守隨。言。劉瑾等八人。罔上誣下。恣意肆情。而瑾尤甚。並不報。初。劉健等致仕。給事中呂紳。劉蒞上疏。畱之。南京兵部尙書林瀚。聞而歎息。於是南京六科給事中戴銑等十三道御史。薄彥徽等上疏。請斥權閹。正國法。畱保輔。託大臣。以安社稷。劉瑾矯旨。遣緹騎逮繫錦衣衛獄。罷戶部尙書韓文。劉瑾恨文。令人日伺其過。會有進納內府折銀者。內有假僞。矯旨文不能防奸。落職閑住。瀕歸。陰遣邏卒伺於途。文乘一羸。宿野店而去。戶科給事中徐昂。上言。文率九卿上疏。忠憤所激。不應停勒。昂坐除名爲民。於是文子高。唐州知州。士聰。刑部主事。士奇。皆削籍。降戶部郎中李夢陽爲山西布政司經歷。尋罷之。劉瑾矯詔。勸張敷華。楊守隨俱致仕。以宣府總督劉宇代敷華。宇附焦芳。結瑾。故有是用。尋以宇爲兵部尙書。

十二月吏部尙書許進奏南京科道皆要職。欲行南京部屬暫署而待各官問畢還職。瑾怒。矯旨罰進俸。先是進在兵部與瑾同督京營。故改吏部。至是與瑾多不合。瑾銜之。尋劉蒞呂狃及戴銑薄彥徽等二十人各廷杖除名爲民。瑾復矯詔降南京兵部尙書林瀚爲浙江左參政致仕。瑾素嫉瀚。正直。南京科道官言事被逮。瀚獨往送。且議上章直之。瑾聞益怒。勒科道詞連瀚。矯旨降之。南京副都御史陳壽獨疏申救。瑾亦矯詔除名。兵部主事王守仁上疏言戴銑等職居司諫。以言爲職。其言而善。自宜嘉納。如其未善。亦宜包容。以開忠讜之路。乃今赫然下命。遽事拘囚。在陛下之心。不過少示懲創。使其後日不敢輕率。妄有論列。非果有意怒絕之也。下民無知。妄生疑懼。在廷之臣。莫不以此舉爲非。然莫敢爲陛下訟言者。豈其無憂國愛君之心哉。懼復以罪銑等者罪之。則無補國事。而徒增陛下之過舉耳。臣恐自茲以往。雖有上關宗社危疑之事。陛下孰從而聞之。苟念及此。甯不寒心。况今天時凍沍。萬一遣去官校。督束過嚴。銑等在道。或遂失所。填溝壑。使陛下有殺諫臣之心。然後追咎左右。莫有言者。則既晚矣。伏願追收前旨。使銑等仍舊供職。擴大公無我之仁。明改過不吝之勇。豈不休哉。疏入。瑾怒。矯詔杖五十。斃而復甦。謫貴州龍場驛丞。旣謫。後瑾使人伺之途。將置之死。守仁至錢塘。慮不免。乃乘夜佯爲投江。而浮冠履水上。遺詩有百年臣子悲何極。夜夜江濤泣子胥之句。浙江藩臬及郡守楊孟瑛皆信之。祭之江上。家人亦成服。守仁遂隱姓名入武彝山中。已而慮及其父華。卒赴驛。華時爲南京吏部尙書。劉瑾勒令致仕。帝悉以天下章奏付劉瑾。瑾時雜構戲玩娛帝。候帝娛。則多上章奏請省決。帝曰。吾安用爾爲。而一煩朕。瑾由是自決政。瑾初亦送內閣擬旨。但秉筆者逆探瑾意爲之。其事大者令堂候官至瑾處請明。然後下筆。後

瑾竟自於私宅擬行。多出松江人張文冕手。張文冕者。故市僧。嘗犯法。南京兵部尚書何鑑捕置之理。亡匿附瑾。瑾倚之。府部等衙門官稟公事。日候瑾門。自科道部屬以下皆長跪。大小官奉命出外。及還京者。朝見畢。必赴瑾見辭。以爲常。惟瑾自建白本。則送內閣擬旨。東陽等必極爲稱美。有曰爾剛明正直。爲國除弊等語。識者鄙之。劉瑾使禁直指揮點視六科官辰入酉出。毋離其次。

二年春正月。劉瑾矯旨。枷尙寶卿顧璿。副使姚祥於長安左右門外。郎中張瑋於張家灣。俱以違例乘轎。爲東廠所發也。時瑾遣邏卒伺韓文於途。無所得。遇璿等。遂以其事上。已而以大學士李東陽疏營救甚力。瑾不得已。乃瀕死而後釋之。各坐譴戍。閏正月。劉瑾矯詔令吏兵二部。凡進退文武官。先於瑾處詳議。兩京都察院各道有奏章。必先呈堂稟詳。然後上聞。二月。以都御史曹元巡撫陝西。元故與劉瑾親。遂用之。劉瑾矯詔遣科道查盤天下軍民府庫。其存留者皆令解京。郡縣積儲爲之空匱。三月。劉瑾矯詔榜奸黨於朝堂。頒示天下。略曰。朕以幼沖嗣位。惟賴廷臣輔弼。其不逮。豈意去歲奸臣王岳。范亨。徐智竊弄威福。顛倒是非。私與大學士劉健。謝遷。尙書韓文。楊守隨。林瀚。都御史張敷華。戴珊。郎中李夢陽。主事王守仁。王綸。孫槃。黃昭。簡討劉瑞。給事中湯禮敬。陳霆。徐昂。陶諧。劉蒞。艾洪。呂紳。任惠。李光翰。戴銑。徐蕃。牧相。徐暹。張良弼。葛嵩。趙仕賢。御史陳琳。貢安甫。史良佐。曹蘭。王宏。任諾。李熙。王蕃。葛浩。陸崑。張鳴鳳。蕭乾元。姚學禮。黃昭道。蔣欽。薄彥徽。潘鏜。王良臣。趙祐。何天衢。徐珏。楊璋。熊倬。朱廷聲。劉玉遞。相交通。彼此穿鑿。各反側不安。因自陳休致。其敕內有名者。吏部查令致仕。毋俟惡稔。追悔難及。是日朝罷。令廷臣跪金水橋南聽詔。劉瑾矯詔京官養病三年不赴部者。革爲民。未久者。嚴限赴京聽選。瑾知科道等

官忤己者養病避禍。故嚴禁錮之。夏四月。劉瑾矯詔令內閣撰敕天下鎮守太監得預刑名政事。其最爲害者。河南鎮守廖堂剝取民財。輦送數十萬於京師。畢貞者。初差天津取海鮮。後請敕自山東沿海達於蘇松浙江福建。所至括民財。陵辱官司。莫敢言者。故事。六部奏準。備事由送內閣請敕書。未有不由六部內閣自出敕者。瑾付內閣。爲之東陽等不能執奏。唯唯而已。逮南京巡撫右副都御史艾璞下獄。先是。魏國公徐備與無錫民家爭田。璞歸田於民。備賂劉瑾。差官覆勘。使者乘瑾風旨。悉以其田予勳戚。且劾璞前勘非是。瑾矯旨逮赴詔獄。訊之。璞不屈曰。此實民田也。瑾怒。箠之幾死。數日方甦。謫海南。罷禮部尙書李傑。時晉府鎮國將軍袁糠賂劉瑾。求封郡王。傑持不與。曰。皇帝祖訓無載也。瑾矯旨許之。而勒令傑罷去。復起前禮部尙書張昇代之。昇初以忤瑾致仕。已而復不合罷。甯王宸濠厚賂劉瑾。請復其先世已革護衛。瑾矯旨與之。劉瑾等誣逮工部給事陶諧。廷杖落職爲民。諧前後上疏戒逸游。遠讒佞。停止不急工作。差官賣鹹織造。皆直指羣奸欺蔽之罪。瑾等以是大恨之。已而復以他事逮之。理摺。撫百端。終不屈。杖戍肅州衛。五月。以講官詹事楊廷和爲南京戶部右侍郎。學士劉忠爲南京禮部右侍郎。舊事御筵畢。必獻規諫語。是日。廷和忠直講。旣罷。上謂劉瑾曰。經筵講官耳。何多詞。劉忠與廷和皆舊東宮官。奏曰。二人當令南京去。遂有是遷。時南部無缺。皆添註。雖陞之。實遠之也。忠謂廷和曰。此行須別瑾否。廷和曰。瑾所爲如此。不可再見之人。知必以我輩交瑾矣。忠深然之。廷和乃以蜀錦辭瑾。瑾曰。劉先生不足我耶。遂厚廷和而疎忠。時劉宇爲中樞。託保國公家人朱瀛者交通劉瑾。日數往來。兵部郎中楊廷儀。廷和弟也。每俟瀛出。必招入私署。畱坐款語。四司官有不附宇者。瀛必言於瑾。令外補。廷儀獨諂。

諛字廷儀能文。字章奏皆廷儀爲之。吏部推總督兩廣右都御史熊繡掌南京都察院事。劉瑾矯詔令致仕。繡在兵部結怨中貴。至兩廣供應裁革。日唯廩給數升而已。瑾使人蹤跡其人歎息而去。瑾竟不能害。致仕歸之日。雖紙筆藥餌一無所取。六月。給事中許天錫手具登聞鼓狀。力陳時弊。懷中不敢奏。自經屋梁死。天錫在宏治中素言事有氣節。時給事中鄒夔覆視榆林功次。瑾私人冒功多。夔難所紀。敘亦自經死。給事中周鎰使還。當賂瑾。無所借資。自刎桃源舟次。劉瑾議革天下提學官。吏部尙書許進謂提學作育人材之本。執奏不可止之。太監李榮傳旨。御馬太監谷大用父奉。御用太監張永父友俱陞錦衣衛指揮使。尋俱進都督同知。此內臣父兄授官之始。秋八月。欽天監五官監候楊源奏。自正德二年以來。火星入太微垣帝座之前。或東或西。往來不一。勸上思患預防。意蓋指劉瑾也。瑾大怒曰。源何官亦學爲忠臣耶。矯旨逮送錦衣衛。杖三十。謫戍肅州。至懷慶卒。妻度氏斬蘆荻覆屍。葬於驛。後源父御史瑄以劾曹石謫戍嶺外。猶幸生還。源忠直不愧其父。而身遂不免。朝野悲之。劉瑾改其姪壻納粟監生曹謚爲千戶。起其妹夫致仕禮部司務孫聰贊畫大同軍務。冬十月。南京戶部尙書楊廷和入朝。命改廷和爲戶部尙書。兼文淵閣大學士。南京尙書入閣自廷和始。起張綵復爲文選司郎中。綵美丰儀。先爲文選郎。與焦芳相得。給事中劉蒞劾還。至是。芳薦綵於劉瑾。綵故瑾鄉人。謁朝數日後。始往見瑾。瑾喜迎笑曰。好鄉里。外官多不知事。朝後卽來。鄉里遲來最得也。時許進議調驗封郎中石確於文選。疏已入。而瑾欲復用綵。迫進追回用石確。疏以綵易之。尋復以綵爲右僉都御史。而合水韓鼎者亦由瑾陞戶部侍郎。與綵同廷謝。鼎先謝。老不任拜起。又吃吃不能致詞。谷張輩屏後羣笑之。瑾甚愧曰。且看此人。旣謝。

皆歎曰：好男子，此不負所舉矣。綵歸過瑾，瑾設酒餚，預待曰：非都憲，我爲老韓愧死矣。相得益歡。十一月，劉瑾矯詔革天下巡撫。始遣科道查盤各邊芻糧，劉瑾素知邊方召商中納積弊，遣科道官三年一次查盤，回奏內有糧粗糶草沓爛者，瑾矯旨逮繫各巡撫及管糧郎中下獄。既至，鎖扭押至所任地方，勒令加倍賠償。凡各商人納過糧草，未給價銀，皆沒官不給。由是商賈困弊，邊儲日乏。劉瑾矯詔裁革天下按察司兵備官。十二月，逮順天府丞趙璜下詔獄，斥爲民。璜任濟南知府，裁抑鎮撫中貴，瑾故恨之。巡撫四川都御史劉纓謂蜀水惡，請開通巫山道，可自夔陵達夔州，旨未下。遂開道。瑾矯旨械纓下詔獄，廷臣論救釋之。

三年春正月，劉瑾令朝覲官每布政司納銀二萬兩。考察朝覲官，既上奏，翰林學士吳儼家故富，劉瑾嘗有所求，儼不與。御史楊南金者，都御史劉宇廷撻之，不堪辱，養病去。瑾矯旨綴奏尾曰：學士儼帷薄不修，其致仕。御史南金欺詐無病，其爲民。逮李夢陽下錦衣衛獄，尋釋之。夢陽代韓文草疏，瑾已譎出之，猶未釋也。復羅以他事，械至京下獄。將置之死時，翰林修撰康海與夢陽同有才名，各自負不相下。瑾慕海，常欲招致門下，而海不往。瑾恆先施，海輒闕亡答之，竟不一見。至是，夢陽客左氏者，詣獄語夢陽曰：子殆無生路矣。惟康子可以解之。夢陽曰：吾與康子素不相下，今死生之際，始託之，甯不愧於心乎？左曰：不謂李子而爲匹夫之諒也。強之再夢陽，乃以片紙書數字曰：對山救我，唯對山爲能救我。對山者海別號也。左持書詣海，海曰：是誠在我，我豈吝惡人之見，而不爲良友一避咎也。遂詣瑾，瑾大喜，延置上座。海曰：昔唐玄宗任高力士寵冠羣臣，且爲李白脫鞵，公能之乎？瑾曰：卽當爲先生役。海曰：不然，今李夢陽高於

李白而公會不爲之援。奈何欲爲白脫釋哉。瑾曰：此朝廷事。今聞命當爲先生圖之。海遂解帶與之飲。遂曙別去。夢陽由是得釋。而海與瑾往復。竟罹清議矣。左都御史屠滂掌院事。一日上審錄重囚本內寫劉瑾傳奉字重復數多。瑾怒罵之。滂率十三道御史謝罪。御史跪於階下。瑾數其罪斥責。皆叩頭不敢仰視。久乃起。二月起前都御史雍泰提督操江。先是馬文升劉大夏交薦之。及給事中潘鐸等復疏泰有敢死之節。克亂之才。許進薦於瑾。瑾以同鄉故起之。鄉人諭泰謝瑾。泰曰：進退在天。若奈我何。三月改翰林院編修顧清等爲部屬。時焦芳子焦黃中會試中式。芳意欲得大魁。旣而取呂柟第一。黃中居二甲首。芳謂諸執事抑之。遂入言於劉瑾。改清等官。而授黃中簡討。及劉宇子劉仁等六七人俱爲庶吉士。數月。黃中仁等俱擢編修。劉瑾修理莊田。擅掘天地壇後土。侵廠官地五十餘頃。毀官民房屋三千九百餘間。發民間墳二千七百餘冢。降湖廣按察司僉事湯沐爲武義知縣。罷江西按察司副使陳恪。恪沐爲御史時忤瑾。故降之。逮御史涂禎下獄死。禎江西新淦人。初爲江陰令。治行奏天下第一。徵爲御史。差巡長蘆鹽課。劉瑾欲令割送該年餘鹽銀兩。禎不從。瑾銜之。後禎復命。俟於朝門。遇瑾。不爲禮。卽矯旨下錦衣衛獄。杖戍肅州衛。禎重傷死於獄。仍行原籍查禎男涂樸。起解補伍。瑾敗始得釋。逮前總制三邊都御史楊一清下獄。尋釋之。先是一清巡邊。上疏陳戰守之策。請復守東勝。開屯田數百里。省內運。奏上報可。一清遂與築邊牆。剋期完工。而劉瑾憾一清。罷之。工亦止。至是又惡其築邊糜費。下詔獄。大學士王鏊言於瑾曰：一清有高才重望。爲國修邊。可以爲罪乎。李東陽亦力救。乃得釋。夏四月。劉瑾假湖廣災傷爲名。奏遣同鄉侍郎韓福出理糧餉。福科斂剝削。饋銀數萬。已復命。福兼副都御史。督理湖廣逋賦。

民甚苦之。逮御史王時中下獄。正德初時中抗疏論瑾。瑾銜之。識名於屏。已而時中巡按宣大。見綱紀墮弛。極意振厲。總督劉宇瑾私人也。常以賊吏屬時中。不從。瑾既憾時中。宇復譖之。瑾矯詔逮繫。令荷重枷。露立三法司之前三日。數踣且殆。李東陽援之得釋。以王佐爲南京戶部尙書時。遣科道稽覈各邊糧芻先後。巡撫憲臣多坐累繫獄。佐一日同尙書顧佐等見瑾。瑾言及茲事。曰。朝廷必大誅戮。乃大懼耳。佐曰。本朝未嘗戮大臣。有毀尙書許進者。瑾語諸大臣曰。許進奸邪。若尙書劉宇可爲吏部。佐曰。佐與劉尙書素厚。與許尙書交淺。然許素有望。恐劉尙書不如也。毀之者因曰。王佐黨進。瑾怒。遂有是遷。欲姑遣之去而徐圖之。劉瑾矯詔令進士陳璋致仕。璋登宏治乙丑進士。旣歸。欲終身養母。母讓之曰。不聞舍孝子而爲忠臣者乎。吾得汝祿養足矣。促北上。至是抵京。值瑾竊政獲罪。遂矯命令致仕。許進宣言於朝曰。古今曾有進士致仕者乎。而欲援之力不能。同事強璋賄瑾。璋曰。官以賄成。吾不爲也。怡然就道。及家甫二旬。而母終。議者謂天所以成孝子也。後瑾誅。應詔起用。五月。南京大饑。劉瑾矯詔敕運米三十三萬石轉卹鳳陽。南京兵部尙書何鑑執奏。言留都地方重於鳳陽。災傷甚於淮西。止之。始得遣官賑濟。劉瑾矯詔籍沒已故戶部尙書秦紘。通政強珍財產。家屬遣戍。西廠太監谷大用遣邏卒四出。刺南康民吳登顯等三家。以端午競渡。擅造龍舟。捕之。籍其家。自是偏州下邑。見華衣怒馬。京師語音。輒相驚告。官司密賂之人。不貼席矣。六月。鎮守太監廖堂薦舉內外官。預擬陞調。吏部多徇之。吏科給事中何紹正劾堂。雖奉旨察賢否。注遷當付吏部。上責堂下所薦於御史。執朝官三百餘人下詔獄。時早朝。有遺書丹墀者。上命拾以進。則告瑾不法狀也。瑾大怒。矯旨跪百官奉天門下。諸監立門東。監之。有頃。命大臣

出翰林院官東向跪曰。內監雅待衆翰林。敢爾。亦使出。御史等官東向跪曰。御史習知法度。亦甯敢爾。瑾不聽。時暑甚。僂偃十數人。命曳出。內監黃偉忿曰。書中所言皆爲國爲民好男子。死卽死耳。何不自言嫁禍他人爲瑾。努目曰。是何好男子。不露章。乃匿名。匿名固死也。矧御前拉諸監入。李榮曰。入矣。公等俛而舒。令內豎擲冰瓜焉。有頃。瑾還來。榮曰。來矣。皆還跪。瑾目之怒。復入。至暮。盡送下詔獄。長安鬻飯者爭飯百官市中。明日。李東陽疏救。瑾微聞出內寺。乃得釋。上手匿名書曰。汝謂賢。吾故不用。汝謂不賢。今用之。遂退李榮。黃偉。任瑾益專。逮前戶部尙書韓文下獄。瑾已勒文落職。怒不已。乃以戶部廣東司遺失簿籍。遣官校械繫至京。下錦衣衛考訊。欲置之死。監禁數月。罰米二千石。赴大同親納。時諸大臣忤瑾去者。瑾俱誣以舊事。令輸粟塞下。尙書王佐。張縉。楊守隨。何鑑。都御史熊繡。孫需。戈瑄等皆不免。鬻產不能給。稱貸以償。縉紳爲之騷然。給事中安奎。潘希曾。御史張彧。劉子勵俱以查盤後先忤瑾意。下獄。奎。彧。荷校且死。李東陽疏救之。始釋。希曾。子勵杖三十爲民。秋七月。以雍泰爲南京戶部尙書。瑾以泰不附己。恨之。併欲逐許進。尋。遂矯詔令泰致仕。時保國公家人朱瀛者。謀傾許進。以劉宇代之。因進嘗薦雍泰。乘閒言於瑾曰。許尙書佯爲恭謹。而外示抗直。如雍泰爲山西按察使。及宣府巡撫。皆以剛暴辱屬吏。朝廷屢貶不用。今進欺公舉用。又揚言公因泰同鄉用之。非吏部本意。瑾大怒。立召原任文選郎中張綵入內。詰問雍泰貶謫事。如何不備入奏。內綵曰。奏稿備載。許尙書塗之。瑾索原稿視之。果然。於是擬旨以進欺罔斥致仕。尋除名爲民。馬文升。劉大夏俱以薦雍泰削籍。編修劉瑞亦以薦泰罰粟二百石。輸大同。八月。逮前兵部尙書劉大夏。南京刑部尙書潘蕃下獄。謫戍。大夏在中樞議革勇士。節光祿。無名供饋。歲省

官府浮費數百萬。近幸滋不悅。大夏既歸。有激怒於上者。太監甯瑾素重大夏。叩頭諫曰。此先帝意。非大夏建白。乃免。又孝宗召見。嘗言劉宇在大同私養官馬。饋送權貴。孝宗密遣錦衣衛百戶邵琪往察之。以養馬未送回奏。太監李榮爲解得免。至是。宇銜舊怨。言於劉瑾。謂籍大夏家。可得數萬金。焦芳亦共譖之。會土目岑猛怨潘蕃。圖還田州。納賂瑾。瑾簡蕃原奏。岑猛獄詞。大夏在兵部議覆。遂矯詔以猛爲田州同知。逮大夏。蕃至京。下錦衣衛獄。將坐以激變。士官罪死。大學士王鏊曰。岑氏未叛。何名爲激變。都御史屠瀟亦言。大夏不宜深罪。瑾怒。謾罵曰。卽不死。可無戍耶。李東陽婉解之。瑾使使詞大夏家貧。乃與宇謀。與蕃俱擬戍廣西。焦芳曰。是送二人歸也。遂發甘肅衛大夏雇贏車出都門。觀者如堵。所在罷市。父老涕泣。士女攜筐進果食。有焚香密禱願大夏生還者。以南京右都御史張泰爲南京戶部尙書致仕。秦素清貧。爲都御史。奉表賀聖壽。以玉葛遺瑾。瑾銜之。會吏部推補是職。瑾矯旨致仕。劉瑾矯詔以劉宇爲吏部尙書。曹元爲兵部尙書。南京提學御史陳琳上言。惜老成。宥狂直。謫廣東揭陽縣丞。琳因瑾排大。臣出臺諫。故言及之。九月。江西按察司副使王啓忤劉瑾。降廣西容縣知縣。啓爲御史時。敢言忤中貴。瑾銜之。故有是降。尋又令廣西巡按提問。罰米三百石。輸官。瑾又矯旨留巡按御史胡瓚二年。瑾以己陝西人。瓚不附己。故留之。未幾。論遼東事。罰米三百石。劉瑾禁各處有司不許奏災異。冬十月。劉瑾矯詔以翰林學士張曷爲鎮江府同知。修撰何瑋爲開封府同知。曷。瑋皆抗直。見瑾不爲禮。坐事謫之。下陝西舉人郝序於獄。序。戶部侍郎郝志義子。志義卒。序援例乞祭葬。瑾謂洪武禮制無此例。下錦衣衛獄。謫戍。瑾自擅政。馬永成等八黨父俱封都督。造墳葬祭。所命祭文。皆李東陽撰。臺諫不敢言。劉瑾矯旨

改惜薪司外廠爲辦事廠。榮府舊倉地爲內辦事廠。時既立西廠。以谷大用領之。瑾又自領內廠。比東西廠尤酷烈。中人以微法往往無得全者。市井遊食無業之人如磨工鬻水者皆逐之。四出千餘人。集城外東郊。持白梃劫人。聲言欲甘心瑾。瑾懼。乃復之。瑾又令寡婦盡嫁。及停喪未葬者盡焚棄之。京師閔然。瑾恐有變。乃罪其首倡言者一人。以安衆心。皆立內廠以後事也。劉瑾矯詔天下發遣盜賊連親屬。十

一月。劉瑾勅元真觀於朝陽門外。大學士李東陽爲製碑文。極稱頌。

四年春正月。總督漕運副都御史邵寶致仕。時公卿多出入瑾門。寶一無所通。瑾數以危言撼之。不爲動。瑾惡平江伯平江伯漕帥也。事與寶相關。瑾怒。禍且不測。李東陽力解之。乃得致仕去。以山西提學副使王鴻儒爲國子祭酒。鴻儒在山西有聲。劉大夏嘗對孝宗稱其大可用。吏部從人望舉之。尋以守正忤劉瑾。回籍。罷興化知府張嶺爲民。嶺先任刑部郎中。時隆平侯張佑卒無嗣。弟姪爭襲。賂瑾。瑾屬之。不爲徇。正德三年。出守興化。瑾有所餽。不報。郡人戴大寶弱冠登第。瑾欲奪其舊聘。以弟女妻之。以屬嶺。亦拒不許。瑾怒。遂撫隆平侯奪爵。事誣罷歸家。二月。劉瑾矯詔行吏部。不時考察兩京及在外方面官。勒原任大學士劉健。謝遷爲民。先是。詔舉懷才抱德之士。以餘姚周禮。徐子元。許龍。上虞徐文彪。應詔。劉瑾以四人皆遷鄉人。而草詔由健。欲因而害之。矯旨下禮等鎮撫司鞫之。劉字阿瑾。意劾有司。訪舉失實。鎮撫詞連健。遷。瑾持至內閣。欲籍其家。李東陽徐爲勸解。得少釋。焦芳抗聲曰。從輕處。亦當除名。旣而旨下。健。遷除名。禮等戍邊。令餘姚人從此毋選京朝官。三月。以錢璣爲戶部尚書。璣附瑾。故不次用。夏四月。大學士王鏊致仕。時瑾權傾中外。雖意不在鏊。然見鏊開誠與言。初亦閒聽。及焦芳用事。專事媵阿。

而瑾驕倖日甚。毒流縉紳。鑿欲遏之力不能。居嘗戚然。瑾曰。王先生居高位。何自苦。乃爾耶。鑿因求去。瑾意愈拂。衆虞禍且不測。鑿曰。吾義當去。不去。乃禍耳。瑾使伺鑿。無所得。鑿疏三上。許之。賜璽書。乘傳歸。時方危。鑿之求去。咸以爲異。數云。以王雲鳳爲國子祭酒。尙書張綵以人望起之。始被命。欲堅辭。及有遺書言執政者誦太祖寰中士夫不爲吾用者當殺身滅家語。雲鳳父大司徒佐曰。吾老矣。汝置我何處。死耶。雲鳳泣就道。至無所餽。瑾怒。欲重以禍。不能得而罷。時國學教廢。雲鳳立條約示諸生。約束甚嚴。士子卒感服。尋乞養病歸。劉瑾矯詔以宏治中纂修大明會典。壞祖宗舊制。雜以新例。悉毀之。降吏部尙書梁儲爲右侍郎。庶子毛澄。諭德傅珪等皆降職。大學士王鑿致仕免究。唯李東陽如故。五月。逮廣東兵備僉事吳廷舉下獄。時鎮守恣橫。廷舉劾太監潘忠二十罪。併及劉瑾。忠亦誣列廷舉。逮獄。鞫之。無狀。止以枉道歸家。荷校吏部門前。主事宿建輩謀救之。尙書張綵閱奏。稟心賞其能。言於瑾。凡十二日得釋。謫戍邊衛。踰月赦爲民。改翰林侍讀徐穆。編修汪俊等爲南京部屬。瑾素惡諸翰林不行跪禮。至是修孝宗寶錄。成例進秩。瑾謂文士不習世故。摘所忌十餘人爲南京員外郎。主事等俾擴充政務。始瑾以翰林慢己。與張綵謀欲調之外。綵不可。至是瑾復持之。綵爲講解。意已平。而焦芳父子及段吳輩謂可乘此擠其素有讐隙者。乃以名投瑾。從史成之。大學士焦芳以老病致仕。遣御史等官清理各邊屯田。初劉瑾既止各邊年例銀。又禁商人報納。邊儲遂大匱乏。因詢國初如何充足。議者以爲國初屯政修舉。故軍食自足。後爲世家所佔。以此不給。瑾遂慨然修舉屯田。分遣胡汝礪。周東。楊武。顏頤壽等往各邊丈量屯田。以增出地畝數。多及追完積逋者爲能。否則罪之。各邊僞增屯田數百頃。悉令出租。人不聊生。周東在

甯夏尤苛刻。加刑於軍官妻。人心憤怒。指揮何錦等遂與安化王真鐸謀起兵。傳檄以誅瑾爲名。瑾禍自此始矣。六月。進吏部尙書劉宇少傅兼太子太傅。文淵閣大學士入閣辦事。以吏部左侍郎張綵爲吏部尙書。時吏戶兵尙書皆瑾黨。八月。榮王祐樞之國常德。劉瑾惡王居京邸。與張綵謀遣之。劉瑾受都督神英賂。加涇陽伯爵。給誥券。劉瑾招引四方術士。余明余倫余子仁等占候天文。推測命數。私置軍器。明等妄稱瑾姪劉二漢當大貴。瑾陰令內使藏小刀二於扇內。出入禁闕。閏九月。奪平江伯陳熊爵。正德三年。熊總督漕運。劉瑾橫索金錢。不應。瑾囚中以法。欲置之死。李東陽力爭之。瑾曰。熊所犯罪重。不宜姑息。東陽曰。子誠姑息。然非姑息。陳熊乃姑息。陳瑄耳。瑄任太宗朝。開濟甯河道。通漕。大有功。勒銘鐵券。子孫免死。豈可盡革。傷天下武臣心。瑾不悅。竟坐多買田宅。侵民利。謫海南衛。奪其誥券。劉瑾矯詔下刑部侍郎陶琰獄。陝西游擊徐謙。許奏御史李高。而謙故劉瑾黨也。又厚賂瑾。欲中高以危法。會上命琰往覈其事。琰據法直高。謙以告瑾。瑾矯詔下之獄。禁錮兩月。削籍。冬十一月。命給事中張繪。御史房瀛等查盤兩直隸各省錢糧。先是。諸司官朝覲至京。畏瑾虐。恐罹禍。各斂銀賂之。每省至二萬兩。往往貸於京師富豪。復任之日。取官庫貯倍償之名曰京債。上下交征。恬不爲異。時張綵聞而言之。瑾不自安。謀差官查盤。蓋欲掩其迹也。劉瑾奏訪金華知府萬福老疾。蘇州知府鮑璋。同知王忞。賊貪。江西左布政馬龍貪濫。僉事阮賓輕浮。謫降。提問有差。巡按山東胡節斂銀饋瑾。瑾知之。捕下獄死。侍郎張鸞自福建還。斂銀二萬送瑾。瑾收之。承運庫降黜鸞。給事中歐陽雲。御史貝儀。少監李宜。指揮趙良。皆以賄瑾削籍。時瑾酷法。繩人內外。貨賂不貲。吏部尙書張綵過瑾。從容爲瑾言。瑾殊納之。然終不能改也。劉瑾

擢都督僉事曹雄爲左都督。陝西自楊一清罷。邊寇猖獗不可制。總督尙書才寬好野戰。自將由興武擊套部。斬首數十級。狃勝深入。遇伏。中流矢卒。巡按御史劾曹雄臨陣退縮不救。瑾挾私切責御史。而更超擢雄。十二月。追奪大學士劉健。謝遷。尙書馬文升。劉大夏。韓文。許進等六百七十五人。誥敕爲民充軍。從都給事中李憲言也。改吏部尙書梁儲於南京。儲不附瑾。故有是調。

五年春二月。以兵部尙書曹元爲吏部尙書。兼文淵閣大學士。入閣辦事。正德中。不由翰林入閣者三人。楊一清以才望。劉宇。曹元皆附劉瑾得之。劉瑾出太監張永於南京。不果行。瑾欲盡除札已者。一日。伺閒言於上。調張永於南京。旨未下。卽日逐永出。就道。榜諸禁門。不許永入。永覺之。直趨至御前。訴己無罪。爲瑾所害。召瑾至。語不合。永奮拳欲毆之。谷大用等勸解。上令諸近臣置酒和釋。夏四月。劉瑾矯詔令南京刑部尙書吳洪致仕。甯河王鄧愈後有兄弟爭田宅者。其兄倚瑾爲援。洪直之。故及。安化王寘鐸反。起都御史楊一清。命太監張永提督討之。一清與永西行。一日。歎息泣謂永曰。藩宗亂易除。國家內亂。不可測。柰何。永曰。何謂。一清曰。公豈一日忘情。故無能爲公畫策者。遂促席手書瑾字。永曰。瑾日夜在上。旁上一日不見瑾。則不樂。今其羽翼已成。耳目廣矣。且柰何。一清曰。公亦天子信幸臣。今討賊不付他人。付公。上意可知。公試班師入京。詭言請上閒語甯夏事。上必就公問。公於此時上寘鐸僞檄。并述渠亂政凶狡。謀不軌。海內愁怨。天下亂將起。上英武必悟。且大怒誅瑾。瑾誅柄用公。公益矯瑾行事。呂強張承業暨公千載三人耳。永曰。卽不濟柰何。一清曰。他人言濟不濟未可知。言出公必濟。顧公言時。須有端緒。且委曲脫上不信。公頓首請死。願死上前。卽退。瑾必見殺。又涕哭頓首。得請卽行事。無緩頃刻。漏事機。禍不

旋踵。永攘臂起曰：我亦何惜餘生報主乎？六月，大學士劉宇致仕，宇附瑾，排斥正人，知瑾將敗，先乞身免。秋八月，劉瑾伏誅，初，眞鐸反，移檄數瑾罪，莫敢上聞，有指揮徐鯤者，傳檄示人，瑾捕下獄，論死，因下赦，寬恤以收人心，未幾而眞鐸就擒，悔欲反之，方侈然自爲功，矯旨加己祿米，擢兄劉景祥爲都督，張永等與瑾爭權，勢不相下，至是望日甲午，永至自甯夏獻俘，上迎之東華門賜宴，比夜，瑾先退，夜半，永出疏懷中，謂瑾激變甯夏，心不自安，陰謀不軌，狀永黨張雄、張銳亦助之，上曰：罷矣，且飲酒，永曰：離此一步，臣不復見陛下也，上曰：瑾且何爲？永曰：取天下，上曰：天下任彼取之，永曰：置陛下何地？上悟，允其奏，當夜卽命禁兵逮瑾，永等勸上親至瑾第觀變，時漏下三鼓，瑾方熟寢，禁兵排闥入，瑾驚問曰：上安在？對曰：在豹房，瑾披衣起，謂家人曰：事可疑矣，趨出戶，被執就內獄，明日降爲奉御，閑住之鳳陽，命廷臣議其罪，瑾嘗招置術士余明等，太監孫和造衣甲弓弩遺瑾，瑾皆受藏之，竊有不軌圖，是時瑾兄都督景祥死，將以八月甲午葬，百官多會送，瑾初嚴夜禁，星出後，衢道四寂，有竊聽者，中夜聞兵甲聲，錚然，里巷私語籍籍，謂傾朝送葬，瑾且因爲亂，永之獻俘也，瑾使以乙未入，永知卽以甲午入，以故得先發，明日晏朝，後外人微聞，瑾得罪，猶莫敢顯言者，及旨猝中發，邏卒飛騎交馳於道，浹日乃定，初，上尙未有意誅瑾，瑾聞鳳陽之命，曰：猶不失富太監也，及籍其家，得金二十四萬錠，又五萬七千八百兩，元寶五百萬錠，又一百五十八萬三千六百兩，寶石二斗，金甲二，金鈎三千，玉帶四千一百六十二，束獅蠻帶二束，金湯盒五百，蟒衣四百七十襲，牙牌二匱，穿宮牌五百，金牌三，袞袍八，爪金龍四，玉琴一，玉瑤印一，盞甲三千，冬月團扇飾貂皮扇中，置刀二，衣甲千餘，弓弩五百，上大怒，曰：瑾果反，乃付獄，吏部尙書張綏，錦衣衛指揮楊玉，石文義

等六人皆送都察院獄。於是六科十三道共劾瑾罪三十餘條。上是之。命法司錦衣衛執瑾午門廷訊之。都給事中李憲亦劾瑾。憲故出瑾門下。瑾聞之。笑曰。李憲亦劾我耶。鞫之日。刑部尙書劉璟猶噤不敢聲。瑾大言曰。滿朝公卿皆出我門。誰敢問我者。皆稍稍卻。駙馬都尉蔡震曰。我國戚也。不出汝門。得問汝。使人批瑾頰曰。公卿朝廷所用。何由汝。抑汝何藏甲也。曰。以衛上。震曰。何藏之私室。瑾語塞。既下獄。上命毋覆奏。凌遲之。三日。梟其首。榜獄詞處決圖於天下。諸被害人爭買其肉啖之。有以一錢易一樹者。瑾親屬十五人并二漢。張文冕。楊玉。石文義等皆論斬。張綵死獄中。大學士劉宇。曹元。前大學士焦芳。字子編。修劉仁。芳子侍讀焦黃中。戶部尙書劉璣。兵部侍郎陳震。並削籍爲民。黃中爲檢討。踰年卽陞侍郎。性尤狂恣無恥。時土官岑濬沒入家口。內有殊色。芳求瑾得之。後臥病。黃中丞焉。瑾誅。言官交章暴其罪。並褫職。瑾流毒五年。變易吏。兵二部選法。將官失律。有加封伯都督者。或徑自傳奉。時綴批別本。惟意而已。又以事籍沒故大臣家。收其妻孥。日夜簡括天下庫藏。添設巡捕。巡鹽等官。四出誅求。諸邊屯田賦稅。以肥私家。海內騷然。以有真鑑之變。而卒及於禍。五年中。惟大理評事羅僑抗疏得脫。中外聞而異之。士大夫悉爲曲學。阿世。瑾嘗有所借。以驗士大夫應違。一朝士某從其門下某請見。某曰。我公好近眉而冠。君之冠高柰何。曰。業定矣。聊姑入。及見。瑾瞪目視。朝士驚。更低冠入謝。瑾乃悅。祭酒王雲鳳先提學陝西。榜笈生徒。有同囚訊。瑾聞而遷之。雲鳳於是往見瑾。瑾叱曰。何物祭酒。一鶩豬毛耶。雲鳳惶恐謝。既退。請瑾臨視太學。如唐魚朝恩故事。復請校刻瑾近行法例。永著爲令。給事中屈銓亦如雲鳳請。刑部尙書劉璟數被詬懼。因劾奏其屬三人。瑾謂能督責。意乃悅。於是瑾以爲無所不可爲矣。一日。瑾涕泣語張綵曰。始谷張

諸人患外臣籍我輩。推余當之。余以身徇天下。所摧折衣冠多矣。今天下之怨皆集於余。諸人晏然享之。予未知所稅駕也。綵因辟左右曰。今上未子。勢必立宗室子。若長且賢。公受禍矣。不如援幼弱者。公長保富貴無憂也。瑾曰。善。居數日。忽變曰。無以宗室爲。吾自立耳。綵告不可。瑾怒。以茗盤擲。綵不敢言。瑾敗。坐綵同叛。綵呼曰。皇天后土。太祖太宗。可鑒其心。初。瑾被縛。有旨降鳳陽。李東陽語諸大璫曰。脫復用。當奈何。張永曰。有我在。無慮。已而。瑾上白帖。言就縛時。赤身無一衣。乞與一二敝衣蓋體。上見帖。憐之。命與故衣百件。永始懼。謀之東陽。令科道劾瑾。劾中多及文武大臣。永持疏至左順門。付諸言官曰。瑾用事時。我輩莫敢言。況兩班官耶。今罪止瑾一人。可易疏入獄。詞具。乃止。連文臣張綵。武臣楊玉等六人。綵疏稱冤。盡發東陽阿瑾事。卒斃獄。劉尸市中。詔焚諸與劉瑾往返書札。時籍瑾書。得秦府永壽王爲瑾慶壽詩序。過於卑諂。上怒甚。欲降旨切責。李東陽上疏曰。自古治亂賊者。正名定罪。誅止其身。昔光武平王郎。得吏民交通文書數千章。皆燒之。曰。令反側子自安。當劉瑾專權亂政之時。假託朝廷威福。以劫天下。生殺予奪。惟其所欲。中外臣工。誰不屈意待之。况王府懿親。自非同惡助叛。法不可赦。其細故小過。亦須曲賜包容。若降旨切責。則凡有書信餽送者。傳聞驚駭。各不自安。臣願聖明廣大涵容。將一應文書涉叛逆事情者。悉焚之。以滅其迹。上從之。封張永兄張富爲泰安伯。弟張容爲安定伯。魏彬弟魏英爲鎮安伯。馬永成弟馬山爲平涼伯。谷大用弟谷大珩爲永清伯。封義子朱德爲永壽伯。給誥券世襲。李東陽奏旬月之閒。二難交作。悉底平定。皆永等之功。故加恩典。命太監魏彬掌司禮監事。四川巡撫郝御史林俊上疏請。上還內宮。擇宗室之賢者。養於別宮。收召老臣劉健。謝遷。林瀚。王鏊。韓文等。以修舊政。又言。瑾雖

死而權柄猶在宦豎。安知後無復有如瑾者。詞旨剴切。大忤左右。不報。御史張芹劾大學士李東陽。劉瑾專權亂政之時。阿諛承順。不能力爭。及陛下任用得人。潛消內變。又攘以爲功。冒膺恩蔭。乞賜罷斥。不聽。時瑾雖誅。而政權仍在內。魏彬馬永成等擅執朝政。兩河南北。楚蜀盜遂起。

谷應泰曰。嗟乎。宦寺之禍。自古烈矣。周禮重奄寺之司。秦風著寺人之制。蓋以其人進身刑餘。廁員灑埽。非有忠孝砥礪之素。而其入也。優游房闈。窺伺色笑。其出也。口銜天憲。手秉王章。固宜其威福專恣。發不旋踵。而傾軋覆軫。動成炯鑒者也。劉瑾以青宮舊侍。狐蠱君側。當其始也。豈遂有莽懿非常之志。溫卓不軌之謀乎。假狗馬音樂以冀君王之憐惜。取富貴苟容足矣。而乃毒蛇不斷。壯夫螫手。韓文一發不中。而顧命諸臣斥逐無遺。六給事十三御史之章再入。而諫官臺臣誅鋤略盡。於是北門之獄驟興。搢紳之禍尤烈。內閣樹其私人。部寺張其羽翼。威燄加於郡國。更置及於巖疆。瑾遂駸駸焉不能安於人臣之位矣。夫水自湍也。風又激之。湯已沸也。火又烈之。廷臣自李東陽而下。無不覲顏要地。甘心頤指。閒或微言解鬪。自託於太邱之弔。張讓然而固寵。依違詎殊於商君之因景。監乎清流之望。旣歸宮府之權。自一小人得志。有自來矣。焦芳劉宇甯足責哉。然而李夢陽之開部密謀。無異於楊一清之密說張永也。王岳范亨徐智之從中奏上。又無異於張永之叩頭哭泣也。李計中洩於政府。而楊謀獲成於闔外。岳亨敗事於濡遲。而張永決策於立談。言於眞鑄倡亂之後者。信而有徵。言於狗馬娛心之日者。迷而難悟。卒之國家受恭顯之禍。政府有匡趙之差。張永收桑榆之功。諸賢深徙薪之痛。易曰。開國承家。小人勿用。豈不信哉。

卷四十四

真鐸之叛

武宗正德五年夏四月。慶府安化王真鐸反。真鐸者。慶靖王曾孫也。祖秩炆。靖王第四子。永樂十九年。封安化王。宏治五年。真鐸嗣王。是時劉瑾擅權。毒流天下。真鐸素有逆謀。與甯夏衛生員孫景文。孟彬往來。甚密。覲王九兒降鸚鵡神。妄言禍福。每見真鐸。輒呼老天子。真鐸益懷不軌。會瑾遣大理寺少卿周東度。田甯夏。倍益頃畝。徵馬屯租甚急。敲朴慘酷。諸戍將衛卒皆憤怨。景文謂真鐸曰。殿下欲圖大事。此其時矣。真鐸遂令景文家置酒。邀諸武弁。素所被辱。丁廣。楊泰等。飲。景文以言激衆怒。且謂真鐸多奇徵。可輔。欲盡殺諸守臣。劫衆舉事。衆方怨。聞景文言。皆忻然從之。曰。卽事不就。死無恨。遂歃血盟。定計。衆散去。景文以報真鐸。真鐸令人往平鹵城。說戍將及素所厚。張欽等十餘人。皆從之。各集衆待時。有邊警。總兵姜漢命周昂簡銳卒爲牙兵。得申居敬等六十人。昂領之。初五日。真鐸遂置酒。召都指揮何錦。周昂。指揮丁廣。謀反。錦。昂者。故常託景文貸真鐸金。納級陞都指揮。德。真鐸深。真鐸大會巡撫安惟學。總兵姜漢。少卿周東。鎮守太監李增。鄧廣漢等。惟學東辭不往。副總兵楊英以聞。警帥兵出。亦不至。錦等詐言塞下警急。呼壯士申居敬備邊。執兵械跨馬。呼譟。儀賓韓廷璋等伏兵府序下。錦等趨安化府。推門入序中。伏兵起。殺漢等。遂走行臺。殺惟學。及都指揮楊忠。又殺周東。縛侯參議。放獄囚。焚官府。劫庫藏。奪河舟。大索慶諸王將軍金幣萬計。召逆黨平鹵城千戶徐欽。引兵入城。僞造印章旗牌。又令景文爲檄。數劉瑾諸罪。狀張綵。劉璣。曹雄。毛倫。文臣武將。內外交結。謀不軌。今特舉義兵。清除君側。凡我同心。並宜響應。傳布邊鎮。以

錦爲討賊大將軍。昂廣左右副將軍。景文爲軍師。欽先鋒將軍。魏鎮等七人。都護朱霞等十一人。總管關中大震。陝西守臣將寘鐸等。刊印劉瑾激變罪惡告示榜文封奏。瑾匿不以聞。總兵曹雄等聞變。率兵沿河堵截。遣廣武營指揮僉事孫隆將大小二壩積垛捲埽柴草盡皆焚燬。楊英率黃正等發靈州順流而下。鐸遣魏鎮等至廣武營散賞。孫隆用弓箭神槍拒卻之。曹雄親帥兵至靈州。初甯夏游擊將軍仇鉞聞邊警。帥兵出玉泉營。寘鐸反。遣人招仇鉞。令以其兵來會。佯許之。帥衆還鎮。鐸奪其軍。單騎歸私第。京師訛言鉞已從賊。又與武營守備保助故與賊聯姻。亦遂疑助爲外應。朝議用助爲參將。鉞爲副總兵。令率兵討賊。於是助上疏言。臣母及妻子俱在賊中。臣義不顧家。恨不飛渡黃河。食賊肉以謝朝廷。鉞亦稱病臥。陰納游兵壯士。俟保助等兵至。從中起爲內應。俄而總兵曹雄亦遣人持書約鉞。鉞蒼頭書童者沒河潛入城。具言保助楊英韓斌時源各率兵屯河上。廣武營都指揮孫隆焚兩壩捲埽。河舟盡泊東岸矣。鉞喜。嗾人謂賊宜急守渡口。防決河灌城。遏東岸兵勿使渡河。何錦果率都指揮鄭卿等三千人出覘渡口。留昂守城。時四月二十三日也。寘鐸出城祭祀社稷旗纛等神。使入呼鉞陪祭。鉞復稱病不出。昂自來問疾。鉞陽呻吟臥伏。諸蒼頭陶斌來得俟昂入。用鐵骨朵擊殺之。割其首級。鉞卽披甲仗劍跨馬門出。呼諸壯士楊真等。從者百餘人。直趨安化府。執朱霞。孫景文等十一人殺之。擒寘鐸及其子台潛。儀賓謝廷槐。韓廷璋。并黨李蕃。張會通等。詐傳鐸令召錦還。而別遣古興兒密告鄭卿。令反正。錦方帥兵還。卿等卽以所部兵擊殺胡璽。魏鎮等十餘人。聲言城中事定。以攜衆心。又往河口執劉鉞。姜永殺之。衆大潰。何錦丁廣。張欽。楊泰正脫身走。追擒之。賀蘭山外。并獲申居敬等。曹雄。楊英各先後至甯夏。鐸起兵。凡十八

日而敗。上聞真鐸反，頒詔天下，慰安人心。詔內有宥充軍罰米官員，停徵糧草等件。出內閣草，中又欲取回各處差出官校。劉瑾有難色，以李東陽言從之。五月，命涇陽伯神英充總兵，太監張永總督軍務。太監陸闇管領神槍，起前右都御史楊一清爲提督，率中外兵討真鐸。時朝內不知，四月二十三日事，故出師。神英等統京營兵，合陝西諸鎮兵馬，分道進剿。瑾矯詔改戶部侍郎陳震爲兵部侍郎，兼僉都御史，討真鐸。暫行總制事。震附瑾，由光祿卿陞戶部侍郎，瑾倚之爲腹心。會真鐸反，衆推楊一清提督軍務。瑾屈於公論，不得已從之。然度一清必辭，故遣震彌縫其閒，冀其成功。將柄用之，已而聞真鐸已就擒，楊一清上疏乞將京軍取回，以安反側。上詔涇陽伯神英以兵還，命張永及一清仍往甯夏。綏安地方，時道路相傳，總督率京營兵將屠甯夏。一清慮激變，遣百戶韋成賈牌曉諭甯夏官舍軍民，大賊已擒，地方無事。天子遣二王重臣來撫，定爾輩。又出示朝廷，止誅首惡，不究脅從。有功者許錄用，各部官員不許聽人誣陷。敢有流造訛言者，治以軍法。侍郎陳震械真鐸送京師，楊一清以事干宗室，處置少疎，恐生他變。又各犯有原謀，脅從情罪不一。一槩解京，將無可活者，故馳往止之。時已渡河，乃收繫靈州以待。一清會太監張永檄鎮守撫按督同王司官公審，分別首謀，共謀隨從等。時鎮巡逮至千餘人，一清出者凡百餘。申居敬、徐欽、程保等止逮其身，繫家屬。俟正犯誅後，徙其妻子。奏聞，下法司議從之。一清又謂永曰：「恩威當並行，不悖。大變之後，堂陛陵替，不復知上下之分。維時造僞命，僞符、手刃、大臣者，戕殺主將，奪其家者，遺奸尙存，無以善後。乃密諭鎮巡捕指揮馮經等，奏上伏誅。」八月，太監張永回京，楊一清仍總制陝西三邊軍務，削慶府護衛。真鐸、錦、廣等械至京，皆伏誅。論功，封仇鉞爲咸甯伯。

谷應泰曰。正德二年四月。慶府寘鐸反。十四年六月。甯府宸濠反。逆同罪均。固已。然古者天子居重馭輕。先奠根本。分建宗子。次固維城。無事則修職稱貢。率土歸王。有事則擐甲荷戈。用紓國難。是以家裕苞桑。國鞏磐石。計深遠也。劉瑾威劫大臣。權傾萬乘。帶刃畜何羅之謀。術士進蒯通之論。二世之禍。直須時耳。寘鐸聲罪發難。志清君側。夫產祿在而興居之兵非叛。武墨篡而敬業之兵亦正。惜其溺志巫覡。擅殺命卿。狼狽稱戈。旣無觀變之智。徘徊河上。初無撥亂之心。所以身膏斧鑕。而秦人莫之哀也。不然。扶蘇受沙邱之詔而吞聲自裁。湘岳得臺城之命而擐甲不進。強枝固本。又何以稱焉。雖然。寘鐸一狂悖豎子也。天誘其衷。狡焉思逞。天殆借鐸爲逆璫授首資乎。寘鐸不反。則張楊夜半之謀不合。甯夏不亂。則武宗腹心之愛不割。張父趙母。社稷之憂。詎有艾歟。觀楊一清道聞鐸擒而急反京兵。緩誅惡黨。豈非狡童游魂。應時翦滅。而璫毒方深。人心易震。內憂未靖。外甯非福。豹房之計得行。而後戰勝之賀。乃在廟堂也。然則甯夏之功不在甯夏。在於楊一清。乘寘鐸以誅城社之奸。南昌之捷不在南昌。在於王守仁。滅宸濠以寒覬覦之膽。嗚呼。皆可謂大臣者矣。

